


1891

1891-1892

891 99

U-75



172 MAR 2011

ԱԶԱՏ ՎԵՏՈՒՆԻ

18

ԲԱՆԱՍՏԵՂԾՈՒԹՅՈՒՆՆԵՐ

37



3426



ՊԵՏԱԿԱՆ ՀՐԱՏԱՐԱԿԶՈՒԹՅՈՒՆ

ՅԵՐԵՎԱՆ—1929

Handwritten mark

Ազատ Բշտունի

# СТИХОТВОРЕНИЯ

ՇՍ.ՊԻԿԸ՝ Հ. Ս. Խ. Հ. Ժողովրդական նկարիչ  
Մ. ՍՍ.ՐՅԱՆԻ

ԱՌԱՋԻՆ ՄԱՍ

ՊԵՏՏՐԱՏԻ ՅԵՐԿՐՈՐԴ ՏՊԱՐԱՆ  
ՅԵՐԵՎԱՆՈՒՄ

Հր. № 980

Պատվ. № 503

Գրատ. № 2075 (բ) — Տիրամ 2000

## ՅԵՐԳ ԻՍ

Տգոր ու զիլ զըրընգա,  
 Հազարահունչ զանգի պես,  
 Յե՛րգ իմ, յե՛րգ իմ, յե՛րգ իմ վառ,  
 Հազարահունչ զանգի պես.  
 Աշխարհը խո՛ր ե, ժխո՛ր,  
 Ծովածավա՛լ, արեվշա՛ղ.  
 Յե՛րգ իմ, յե՛րգ իմ, զըրընգա՛  
 Հազարահունչ զանգի պես:

Կյանքը գարուն ե հիմի  
 Աղմկահույզ յեվ խնդուն,  
 Յե՛րգ իմ, կանչի՛ր, կարկաչի՛ր,  
 Կանաչի՛ր վառ՝ հողի պես.  
 Հույզի, սերի, պայքարի  
 Հազար յերգեր են թնդում,  
 Յե՛րգ իմ, յե՛րգ իմ, շեփորի՛ր  
 Աշխարհականչ փողի պես:

Դյութական ե յերկիրն իմ  
Յեվ անտահման յեվ անծիր,  
Յե՛րգ իմ, շաչի՛ր, շառաչի՛ր  
Փոթորկահույզ ծովի պես.  
Ամեն ընկեր ծանոթի  
Հուզի՛ր, ժպտի՛ր յեվ անցի՛ր,  
Յե՛րգ իմ, յե՛րգ իմ, հուրհուրա  
Արեվաշաղ շողի պես:

Կյանքը թնդում ե թափով—  
Պայքար, թռիչք ու ցավեր,  
Յե՛րգ իմ, ձուլվի՛ր աշխարհին  
Յեվ փոթորկվի՛ր հողմի պես.  
Ու դեռ քանի՛ հաղթանակ,  
Քանի՛ ավեր ու դավեր,  
Յե՛րգ իմ, յե՛րգ իմ, ծառացի՛ր—  
Աշխարհի չորս կողմի պես:

Հզոր ու զիլ գրորնգա՛  
Հազարահունչ զանգի պես,  
Յե՛րգ իմ, յե՛րգ իմ, յե՛րգ իմ վառ,  
Հազարահունչ զանգի պես.  
Աշխարհը խո՛ր ե, ժխո՛ր,  
Ծովածավա՛ր, արեվշա՛ղ,  
Յե՛րգ իմ, յե՛րգ իմ, գրորնգա՛  
Հազարահունչ զանգի պես:

1928—Յերևան



## ԱՄԵՆՈՒՐ

Յեղբա՛յր իմ, ամենուր ես.  
Ու միշտ ել քեզ տեսել եմ.  
Ամեն տեղ, ուր ապրում ես—  
Յես ել կամ ու յես ե՛լ եմ...

Թե մտրակը քեզ ծաղկում ե,  
Մարմինըդ պալարվում ե,  
Ցավիցըդ, ո յեղբա՛յր իմ,  
Իմ սիրտն ել զալարվում ե...

Կարծես թե բիրտ մտրակը  
Մարմինս ե վոր խազում ե,  
Կարծես թե իմ վերքիցն ե  
Արյունը, վոր վազում ե...

Կարծես թե հենց այդ յես եմ,  
Հեվում եմ, կարծրանում եմ.  
Կարծես թե հենց այդ յես եմ,  
Ցնցվում եմ, բարձրանում եմ...

Յերբ յեռք ե մարտի յերգրդ,  
Յերբ կանչող շեփորում ե,  
Յեվ կամբող կապարե կուռ  
Հին կյանքը թե փորում ե,

Կարծես թե իմ հոգին ե,  
Վոր շանթ ե, շառաչում ե.  
Կարծես թե հին աշխարհը  
Զարկիցրս հառաչում ե...

Կարծես թե հենց այդ յես եմ,  
Վոր վառ եմ, վրեժի պես եմ.  
Կարծես թե հենց այդ յես եմ,  
Միլիոն եմ, մեծ ու վես եմ...

Յեղբա՛յր իմ, ամենուր ես.  
Ու միշտ ել քեզ տեսել եմ.  
Ամեն տեղ, ուր ապրում ես—  
Յես ել կամ ու յես ել եմ ..

1921—Թեհրան



ԴԻԿՏԱՏՈՐ

Լսի՛ր,  
Սինյո՛ր,  
Սի՛ր  
Կամ պարո՛ն,  
Այդ յե՛ս եմ:  
Կուզես հուզվիր հույզերով լուռ.  
Կուզես մազերըդ գգիր գուր.  
Կուզես յերեսըդ հողին քսիր.  
Լսի՛ր,  
Սինյո՛ր,  
Սի՛ր  
Կամ պարո՛ն,  
Այդ յե՛ս եմ...

Հիմի  
Հայացքս հառել եմ հեռվին հուր,  
Հիմի  
Մկաններս լարել եմ

Յեզ բռունցքըս՝ պիրկ.  
Հիմի  
Հին հույզերըդ այրում եմ,  
Քայլում եմ դարումը թեժ...

Քայլողը  
Շահ չի՛,  
Սուլթան չի՛,  
եմիր չի՛,  
Դեմիրջի,  
Մաշինիստ,  
Հանքափոր բանվոր եմ յես,  
Լսո՞ւմ ես,  
Այդ յե՛ս եմ...

Յե՛ս  
Իվան—Կարոն—Լի-Չի—Հասանն եմ.  
Յե՛ս  
Ռաբոչի—բանվոր—կուլի—իշչի մասսան եմ.  
Յեզ ամենուր եմ,  
Ուր վոր կաս դու,  
Լսո՞ւմ ես,  
Այդ յե՛ս եմ...

Դարերի ճամպովն յեկա յես  
Յեզ կամ յես աշխարհի ամեն մասում.  
Լսի՛ր,  
Քե՛զ եմ ասում,  
Հիմի

Հաղթող ու վես եմ.  
Հիմի  
Աշխարհի տերը յե՛ս եմ,  
Լսո՞ւմ ես,  
Այդ յե՛ս եմ...

Հոկտեմբերը տեմպեր ե բերել.  
Հոկտեմբերը նոր դար ե կուում.  
Հոկտեմբերը արեզ ե փուում.  
Հոկտեմբերը գոռում ե ուժգին.  
— Հե՛յ,  
Հե՛յ,  
Հե՛յ,  
Փալիս ե  
Ռաբոչի—բանվոր—կուլի—իշչի մասսան.  
Լսի՛ր,  
Սինյո՛ր.  
Սի՛ր  
Կամ պարոն,  
Ջուր ես հուզվում,  
Բացվեն պիտի դռներըդ,  
Կռներըդ կակղեն պիտի.  
Լսո՞ւմ ես,  
Այդ յե՛ս եմ...

Հազինս պարզ շապիկ ե չթից  
Կուռ կուրծքըս—կիսաբաց.  
Կոշիկներըս փոշոտ են դեռ  
Յեզ թնդում են քայլերըս:

Լսո՞ւմ ես,  
Դահլիճնդ եմ մտնում ես կոշտ ձեռներով  
Ու փոշոտ.  
Գալարվում,  
Լարվում ես,  
Փարվում ես որերին հին,  
Ձո՛ւր,  
Լսի՛ր,  
Սինյո՛ր,  
Սի՛ր,  
Կամ պարո՞ն,  
Այդ յե՛ս եմ...

Յե՛ս  
Իվան — Կարոն — Լի. Չի — Հասանն եմ.  
Յե՛ս  
Ռարոջի — բանվոր — կուլի — իջևի մասսան եմ.  
Ջարդում եմ հին թիկնաթողը,  
Հիմի  
Յե՛ս եմ դիկտատորը,  
Այսոր իշխողի պես եմ.  
Վոր վաղն իշխողը լինի — հե՛ջ,  
Վոր վաղը  
Թիկնաթողըս ջարդեմ,  
Հարթեմ ուղին նոր կյանքի...

Լսի՛ր,  
Սինյո՛ր,  
Սի՛ր  
Կամ պարո՞ն,

Այդ յե՛ս եմ,  
Կուզես հուզվիր հույզերով լուս.  
Կուզես մազերըդ գգիր զուր.  
Կուզես յերեսըդ հողին բսիր.  
Լսի՛ր,  
Սինյո՛ր,  
Սի՛ր  
Կամ պարո՞ն,  
Ահա այդ յե՛ս եմ...

1925 — Թիֆլիս



ՔՍԱՆՎԵՑ ԿՈՄՍՈՒՆԱՐՆԵՐԻՆ

1

Ո՞վ կարող ե հավերժությունը թաղել.  
Ո՞վ կարող ե անմար արևը քաղել...  
Անապատում, թե ծովերում, ցամաքում—  
Արփի շողեր վողջ աշխարհն են համակում...  
Ո՞վ կարող ե հավերժությունը թաղել:

Ու սրեցին բյուր դաշույնները հատու,  
Վոր խոցոտեն արևի սիրտը բոցի...  
Դաշույնների հարվածներով մահացու  
Ո՞վ կարող ե արևի սիրտը խոցի...

Անապատի ավազներում հողմածեծ՝  
Արևների ցուրերը շեկ են դառնում...  
Այ արևն եր, վոր անապատը թացեց,  
Յեվ մրրկվող ավազն իրար ե խառնում...

2

Ո՞վ կարող ե հավերժությունը թաղել.  
Ո՞վ կարող ե անմար արևը քաղել...  
Անապատում, թե ծովերում, ցամաքում—  
Արփի շողեր վողջ աշխարհն են համակում...  
Ո՞վ կարող ե հավերժությունը թաղել...

Այս հուրը, վոր սրտումս կրում եմ,—  
Ձեր ալ ու վառ սրտի հրիցն ե...  
Այս սուրը, վոր կռվումը սրում եմ,—  
Ձեր կուռ ու մահատու սրիցն ե...  
Այս գիրը, վոր հիմի յես գրում եմ,—  
Ձեր բորբ ու արնագիր գրիցն ե...

Քայլում ենք ձեր համպովը, քայլում ենք,—  
Ձեր դրոշը մեր ամրակուռ ձեռումն ե...  
Ճամպին ծիգ կառուցում ենք, այրում ենք,—  
Մեր կամքը ձեր կյանքի պես յեռուն ե...  
Քայլում ենք, արևի պես փայլում ենք,—  
Գիտենք, դեռ կայանը հեռուն ե...

Մեր կուրծքը, վոր մրրկով շնչում ե,—  
Արնոտ անապատի հեքիցն ե...  
Մեր յերգը, վոր ռազմաշունչ հնչում ե,—  
Վրեժի-և արևի յերգիցն ե...  
Այն ո՞վ ե, վոր հիմի խոր ննջում ե,—  
Նա խորթ, անհարազատ յերկրիցն ե...

Թաղել են ձեզ անապատում, խորը,—  
Ծածուկ ու հեռավոր վայրումը...  
Կարո՞ղ են միթե թաղել, վո՞րը,—  
Կարո՞ղ են միթե ջնջել արյունը...  
Ընկաք դուք, կբարձրանա միշտ նորը,—  
Մեկի տեղ վոտքի կելնի հարյուրը...

Այս հուրը, վոր սրտումս կրում եմ, —  
Ձեր ալ ու վառ սրտի հրեցն ե..  
Այս սուրը, վոր կուվումը սրում եմ,—  
Ձեր կուռ ու մահատու սրեցն ե..  
Այս գիրը, վոր հիմի յես գրում եմ,—  
Ձեր բորբ ու արնագիր գրեցն ե...

1922—Յերևան



105  
37

## ՓՈՔՐԻԿ ԼՐԱԳՐԱՎԱՃԱՌ

Խարտյաշ մազերո՛վ տղա,  
Լհակ աչքերո՛վ տղա,  
Ցուրտ ե, հագում ես անվերք.  
Թշվա՛ռ, կմեռնիս հազեղ.  
Տոկուն, համարձա՛կ տղա,  
Յեռուն փողոցի՛ տղա,  
Վազիր ու կանչի՛ր ուժգին.  
— Նոր լո՛ւր, հեռագի՛ր, կազե՛թ...

Բոքիկ վոտներո՛վ տղա,  
Առույգ, կիսամե՛րկ տղա,  
Արագ անցնում ես մայթեն.  
Մայթը թնդում ե վազեղ.  
Հպարտ, աշխատո՞ղ տղա.  
Մրի, գրկանքի՛ տղա,  
Կանչի՛ր, անցորդին կանչի՛ր.  
— Նոր լո՛ւր, հեռագի՛ր, կազե՛թ...



Սիրուն, սրիկա՛ տղա,  
Ծխող, շրջմուխի՛կ տղա,  
Ամենքը սիրո՛ւմ են բեզի  
Դյուլթված մանկական նազեղ.  
Խայթող ու հեզնո՛ղ տղա,  
Գզվանքն անարզո՛ղ տղա,  
Թռի՛ր, բարձրածայն կանչի՛ր.  
— Նոր լո՛ւր, հեռագի՛ր, կազե՛թ...

Փոքրիկ, տաս տարո՛ւ տղա,  
Ըմբոստ, մաքառո՛ղ տղա,  
Հոսում ե քրտինք ցակտեղ,  
Այտեղ ու փոշոտ մազեղ.  
Փողոցը քնո՛ղ տղա,  
Անկյուն կուչ յեկա՛ծ տղա,  
Կանչի՛ր, քնիդ մեջ կանչի՛ր.  
— Ցո՛ւրտ ե, մրսո՛ւմ եմ. կազե՛թ ..

1917—ԹԻՓԻՍ



## ԶԱՆԳՀԱՐ

ԼԵՆԻՆԳՐԱԴԻ ՊՐՈԼԵՏԱՐԻԱՏԻՆ

Վե՛ր,  
Զանգհա՛ր,  
Վե՛ր զանգտան կտուր,  
Ու զանգը տո՛ւր...  
Զանգը տո՛ւր...

Հուր հեվանքով  
Յեվ հանգով  
Դու զանգը զա՛րկ,  
Զանգը զա՛րկ.  
Ու զանգը զա՛րկ  
Զանգը զա՛րկ...

Թող զըրընգա՛,  
Թող զընգա՛  
Զարթոնքի զանգը զնգան,  
Զորակոչի զանգը զիլ:

Յեվ հուզանքով  
Ու զանգով—  
Յեզերքներից մինչ յեզերք  
Թող զըրընգա տիեզերք...

Մուր ե աշխարհը հիմա.  
Խոր  
Ու ժխոր ե հիմա.  
Հուր ե աշխարհը հիմա...

Բյուր սրտերումը հիմա —  
Ծփում,  
Խփում են թափով  
Հուր հորձանքները հիմա...

Զանգհա՛ր,  
Զանգի՛ր զանգն ուժգին,

Թող զըրընգա զանգն ամուր—  
Ուր կա քրտինք,  
Ուր կա մուր,  
Թող զողանջի՛,  
Թող կանչի՛,  
Թող վոտք յելնեն ամենուր...

Թող վոտք յելնեն ամենուր —  
Գոռ յեվ ըմբոստ յերգերով,  
Կոշտ ու մրոտ ձեռքերով,  
Կուռ միլիոնները հանուր...

Զանգհա՛ր,  
Արագ ավելի՛,  
Յերգիդ ուժ տո՛ւր,  
Զանգը տո՛ւր,  
Ձեռքիդ ուժ տո՛ւր,  
Զանգը տո՛ւր:  
Արա՛գ,  
Արա՛գ,  
Ավելի՛,  
Դու զանգը զա՛րկ,  
Զանգը զա՛րկ,  
Ու զանգը զա՛րկ,  
Զանգը զա՛րկ...

1919—ԹԻՓԼԻՍ



## ՅԵՐԵՎԱՆ

Այնպե՛ս եմ կարոտդ քաշում,  
Մաշում ե կարոտդ ինձ այնպե՛ս...

Իմ ջիվա՛ն,  
Ի՛մ ջան,  
Ի՛մ նախշուն,  
Յերեվա՛ն,  
Յերեվա՛ն,  
Յերեվա՛ն...

Այնպե՛ս ինձ հարազատ ես դու,  
Ինչպես Մոսկովն ե կամ Պիտեր...  
Կարմրաշող  
Յեվ ազատ ես դու,  
Արեվոտ իմ յերկե՛ր,  
Յերեվա՛ն...

Այնպե՛ս ինձ հուզում ես դու,  
Վոնց վոր վառ Շանհայ կամ Բոմբեյ,  
Գիտեմ,  
Ջա՛ն,  
Ուզում ես դու,  
Վոր քեզ ել գովեմ,  
Յերեվա՛ն...

Վորքան ել վոր լինեմ հեռու,—  
Միշտ ել զգում եմ շունչը քո...  
Գարուն ե բացվել շուրջը քո,  
Շող,  
Շաղ  
Ու շաֆրան,  
Յերեվա՛ն ..

Յե՛ս,  
Արեվելքի պոետ,  
Սալամ տամ աշխարհի քուչին..  
Յերգում եմ  
Հինդ,  
Հաբաշ  
Ու Չին,  
Քեզ ել եմ գովում,  
Յերեվա՛ն...

Դու ել ես արեվի յերկրում,  
Խմում ես արեվի գինի...  
Քեզ հետ յես ել եմ բերկրում,  
Հարբել եմ քեզ հետ,  
Յերեվա՛ն...

Նույնն ե ինձ համար ամենուր,—  
Հյուսիս,  
Արեվելք  
Թե հարավ,—  
Ուր վոր նոր յերգի յեն ծարավ...  
Դո՛ւ  
Նոր յերգիս հույզ,  
Յերեվա՛ն . .

Յես քեզ հետ  
Պոետը քո--  
Յերգում ե,  
Հեվում,  
Կերտում...  
Հզոր շարքերիդ յերթում  
Յերգում ե փառքդ,  
Յերեվա՛ն . .

Այնպե՛ս եմ կարոտդ քաշում,  
Մաշում ե կարոտդ ինձ այնպե՛ս...  
Ի՛մ ջիվան,  
Ի՛մ ջան,  
Ի՛մ նախշուն,  
Յերեվա՛ն,  
Յերեվա՛ն,  
Յերեվա՛ն...

1927—Ռուստով-Դոն



## ԱՇՆԱՆ ՏԵՐԵՎԻ ՆՄԱՆ

ԲՈՒՐԺՈՒԱԿԱՆ ՊՈԵՏԵՐԻՆ

Աշնան տերեվի նման  
Դալո՛ւկ, յերերո՛ւն, խամրա՛ծ,  
Քշվել եք կյանքից հեռու—  
Մի հզոր ու գոռ հողմից...  
Իսկ մեր աշխարհը հիմի  
Գարուն ե ամեն կողմից,  
Բայց դուք տերեվի նման  
Դալո՛ւկ, յերերո՛ւն, խամրա՛ծ...

Իսկ մեր աշխարհը հիմի  
Գարուն ե ամեն կողմից.  
Արեվ ե, ծիծաղ ու լույս,  
Կերտում ենք որեր փարթամ...  
Ո՛, դո՛ւք, պոետնե՛ր լկված,  
Ձեր յերգը՝ տխուր, տարտամ,  
Ձեր ուղին մոլոր ու մութ  
Յեվ փակված ամեն կողմից...

Ո՛, դո՛ւք, պոետնե՛ր լլկված,  
Ձեր յերգը՝ տխուր, տարտամ.  
Մրտում եք հոգնած ու մերկ  
Ձեր հոգու ծմռան ցրտում...  
Անցած որերն են վողբում  
Ձեր մութ յեվ հյուժված սրտում,  
Ներկան՝ ձեզ համար անշող,  
Գալիբը՝ անհո՛ւյս, տա՛րտամ...

Անցած որերն են վողբում  
Ձեր մութ յեվ հյուժված սրտում.  
Հարբում եք գինով, թույնով,  
Որորվում թախժոտ յերգով...  
Լիզում եք կանանցը մերկ—  
Շրթերը կարմիր ներկով,  
Մինչեվ վոր խավարն իջնի  
Ձեր հոգում, ձեր մութ սրտում...

Լիզում եք կանանցը մերկ—  
Շրթերը կարմիր ներկով.  
Իսկ մեր աշխարհումը նոր—  
Սրտերն ենք կարմիր ներկում...  
Շոգե՛գութանը հեվբոտ  
Մեր լայն արտերն ե հերկում,  
Իսկ դուք լիզում եք կանանց—  
Շրթերը կարմիր ներկով ..

Շոգե՛գութանը հեվբոտ  
Մեր լայն արտերն ե հերկում,  
Ծխում են քուլա-քուլա  
Ծխնելույզները վերձիգ...

Քանի՛ ջրանցքներ հոսուն,  
Ելեկտրոկայան հրձիգ,—  
Հին կյանքի կրճի վրա  
Նոր ակոսներ են հերկում...

Քանի՛ ջրանցքներ հոսող,  
Ելեկտրոկայան հրձիգ...  
Քանի՛ ավերակ հյուղեր  
Դարձել են հսկա շենքեր ..  
Յեվ վաղվա կռվի համար  
Կռել ենք քանի՛ զենքեր...  
Ամեն մի բանվոր-զեղչուկ—  
Հին աշխարհի դեմ—հրձի՛գ...

Յեվ վաղվա կռվի համար  
Կռել ենք քանի՛ զենքեր—  
Լենինյան «թույն»-ով ոծած—  
Խարխուլ աշխարհի համար ..  
Յեվ դեռ կերտում ենք անդուլ  
Յեվ դեռ կռում ենք համառ—  
Վաղվա պայքարի համար  
Նորանոր հատու զենքեր...

Աշնան տերևի նման  
Դալ՛ուկ, չերերո՛ւն, խամրա՛ծ,  
Քշվել եք կյանքից հեռու—  
Մի հզոր ու զու հողմից...  
Իսկ մեր աշխարհը հիմի  
Գարուն ե ամեն կողմից,  
Իսկ դուք անարևի ցրտում  
Կմեռնեք դալ՛ուկ, խամրա՛ծ ..

1927—Ռոստով-Դոն

Ժ Ա Մ Ա Յ Ո Ւ Յ Յ Ը

Ժամացույցը հսկա՝  
Հնչում ե միշտ, նորից.  
Կտրատում ե ժամեր,  
Բաժանում որն որից.  
Բաժանում ե անցած  
Հին որերը նորից.  
Ժամացույցը հսկա  
Հնչում ե միշտ նորից...

Աշտարակի վրա  
Պահակի պես կանգուն,  
Զանգում ե միշտ ու միշտ,  
Զարկում ե միշտ, զանգում.  
Որերի պես անկանգ,  
Որերի պես անքուն,  
Աշտարակի վրա  
Պահակի պես կանգուն...

Հնչում ե նա ձմեռ,  
Գարուն, աշուն, ամառ.  
Սլաքները նրա  
Շարժվում են համառ.  
Թաղվում ե հինն անդարձ՝  
Նոր որերի համար.  
Հնչում ե նա ձմեռ,  
Գարուն, աշուն, ամառ...

Զանգում ե մեկ-յերկու,  
Զարկում յերկու-յերեք.  
Կռում ե ժամ յեվ որ,  
Կռում զիշեր-ցերեկ.  
Այսորն անցավ, գնաց,  
Դարձավ անդարձ յերեկ.  
Զանգում ե մեկ-յերկու,  
Զարկում յերկու-յերեք...

Յեվ ամեն մի նոր ժամ,  
Վոր գալիս ե գնում—  
Քանի՛ կյանք ե թաղում,  
Քանի՛ նորեր ծնում.  
Յեվ հոգնածներ քանի՛  
Ճամպին ընկած մնում.  
Յեվ ամեն մի նոր ժամ,  
Վոր գալիս ե գնում...

Իսկ յես յեվ դու յեվ նա,  
Վոր նոր կյանք ենք կերտում—

Միլիոնների կողքին,  
Միլիոնների յերթում,  
Նոր դարերի համպին  
Կյանքի գիրքն ենք թերթում,  
Մե՛նք— յես յեվ դու յեվ նա,  
Վոր քանդում ենք, կերտում...

Ժամացույցը մի՛շտ կա,  
Պահակի պես կանգուն,  
Մեր սրտերի նման  
Բաբախում ե, զանգում.  
Թանգ են ժամերը մեր,  
Կերտե՛նք թափով, անքուն,  
Ժամացույցը մի՛շտ կա,  
Պահակի պես կանգուն...

1917—Թիֆլիս



## ՄԱՆՁՈՒԿ

ԻՄ ՓՈՔՐԻԿ ԵԴՎԱՐԴ ՎՇՏՈՒՆՈՒՆ

Դու դեռ  
Թեթեվ թիթեռ ես,  
Մանչո՛ւկ,  
Թեվերդ նոր են բուսել:  
Ուսել ես նոր յերգ լուսե,  
Դու դեռ  
Թեթեվ թիթեռ ես,  
Մանչո՛ւկ:

Յերբ լուսաբացը զա տուն—  
Վոր փոքր սենյակդ արեվի,  
Քեզ բարեվի կգան կատուն  
Յեվ շնիկդ բրդոտ,  
Մանչո՛ւկ:

Շնիկն ու կատուն ուշիմ—  
Նստում են կողքիդ սիրով.  
Դու սիրում ես նրանց հուշիկ  
Ու ժպտում ես թեթև,  
Մանչո՛ւկ:

Հետո,  
Մեծ մարդու հովեր առած,  
Մի գիտուն ու լուրջ մարդու,  
Հայացքդ նրանց հառած,  
խոսում ես շեշտով հատու.

— Ա՛յ, Լենինը վոր կա, իմ պապն ե.  
Ինձ շա՛տ, շա՛տ, շա՛տ ե սիրում.  
Կարմիր զրքեր ե ինձ տալիս.  
Յե՛վ խաղալիքներ ե բերում:

Ինձ իր ծնկերին դրած  
Ու յես մնում եմ արթուն...  
Հետո իր ձեռքով զրած  
Լավ զրքերիցն ե կարդում:

Յեղեկ ե—զրքում կա տպած—  
Մի մե՛ծ Հոկտեմբեր բռնի,  
Գլուխը յերկնքին կպած,  
Թե՛վերը յերկա՛ր-յերկա՛ր,  
Ձեռները մրոտ ու մե՛ծ—  
Մեր տան դիմացի դարբնոցի  
Թաթոսի ձեռքի նման...

Հոկտեմբեր բռնին եսպես  
Մի որ մեյդանում կանգնած  
Գոռո՛ւմ ե,  
Վո՛նց ե գոռում  
Հողով  
Ու փողով մարդկանց,  
Թե —  
Դուք ինչի՞ յեք ծծում  
Արյունը բանվոր-գեղջուկի.  
Թե —  
Դուք ինչի՞ յեք ծեծում  
Նրանց փոքրիկ մանչուկին...

Գոռում ե,  
Բռնում ե նրանց —  
Ա՛յ, են հողով  
Ու փողով մարդկանց—  
Բռնում ե,  
Բեռնում ե իշին,  
Բշում ե,  
Ծովը թափում...

Ա՛յ եսպես,  
Ելի շա՛տ ու շա՛տ բաներ:  
Մե՛կ,  
Յերկո՛ւ,  
Յերե՛ք,  
Գիտե՞ք,  
Կոմսոմոլ,

Պատկում,  
Պատրա՛ստ,  
Ա՛յ հիմի քայլում եմ,  
Դիտե՛ք:

Լսում են,  
Նսում են հուզված  
Շնիկն ու կատուն,  
Լսում.  
Գլխով են անում  
—Ա. ա՛յ ո՛ ո՛,  
Դնչերը յերեսին են բտում:

Ե՛խ,  
Դո՛ւ դեռ  
Թեթեվ թիթեռ ես,  
Մանչո՛ւկ,  
Թեվերդ նոր են բուսել,  
Արդեն ուսել ես նոր յերգ լուսե.  
Ե՛խ,  
Դու դեռ  
Թեթեվ թիթեռ ես,  
Մանչո՛ւկ...

1924—Թ.Ֆլիս



## ՇՈՒԵԿԱՌՔ

**Ս**ահմաններ չունի հիմա  
Աշխարհը, նո՛ր ե, անծի՛ր.  
Շոգեկա՛ռք,  
Շնչի՛ր,  
Շաչի՛ր,  
Սլացի՛ր,  
Սուլի՛ր,  
Անցի՛ր:

Գծերդ—յերկաթ յերկու—  
Ափերից յերկրի մինչ ափ,  
Բերում են կյանքին նոր հույզ,  
Նոր լեզու, մի զարկ, մի չափ...

Յերգում ես ձայնովդ զի՛լ՝  
Նոր յերգեր, նոր շեշտ յեվ հանգ,  
Դու քանդող կենցաղը հին,  
Դու արվեստ, դու հույզ, հեվանք:

Աշխարհը ողակ-ողակ  
Շղթայիւր, իրար ծուլիւր,  
Շոգեկա՛ոք,  
Շտա՛պ,  
Շտա՛պ,  
Սլացի՛ր,  
Սուրա՛,  
Սուլի՛ր:

Ձարթնել են գյուղերն ահա  
Դաշտերում, լեռան լանջին.  
Յեւ շփոթ ու զարմանքով  
Գերի յեն քո սեգ կանջին...

Քաղաքը գյուղին կապիր  
Յեւ գյուղը բանվոր մարդուն,  
Վոր հիմի յերկրումը մեր  
Նոր կյանք ու բախտ ե հարթում...

Դե անցիր յերկրից յերկիր,  
Դե վազիր դեպ նոր յերկիր,  
Շոգեկա՛ոք,  
Շարժվիր,  
Շնչի՛ր,  
Սլացի՛ր,  
Սուլի՛ր,  
Յերգի՛ր:

Բարեւ տուր կանչովդ սուր  
Քաղաքին ժխոր ու ժիր.  
Հին կյանքի յեւ դարերի  
Մոռացում, մահը զուժիր...

Հրդեհի՛ր հզոր մի հուր  
Հրատենչ մարդկանց հոգում,  
Թող զգան նրանք հիմի  
Պայքարի խինդն ու խոկում...

Սահմաններ չունի հիմա  
Աշխարհը, նո՛ր ե, անձի՛ր.  
Շոգեկա՛ոք,  
Շնչի՛ր,  
Շաչի՛ր,  
Սլացի՛ր,  
Սուլի՛ր,  
Անցի՛ր:

1917—ԹԻՓԼԻՍ



## Մ Ա Յ Ի Ս Ա Կ Ա Ն

### 1

Հեղեղի պես յեկանք այսոր  
Վողողելու փողոցը մեծ.—  
Մեր մանկության որրանը հին,  
Ուր մայրը մեր մեզի ծնեց...

Փողոցներովն այս աղմկոտ,  
Վոլոր ու ձիգ, լայն յեվ անձուկ—  
Անցնում եմ այժմ շարքերը մեր,  
Չուված իրար ու թեվանցուկ...

Մուսացումի փոշիներին  
Հանձնեցինք մենք ցավն ու կական,  
Հզոր ե մեր յերթը հիմի,  
Փոթորկածին յեվ մոզական...

Ու կանչում ենք աշխարհների  
Յեզերքներից դեպի յեզերք.  
— Յես, դու յեվ նա—ամենքս մե՛կ.  
Մեր հայրենիքը—տիեզերք...

Մենք կերտողներ դարը գալիք,  
Աշխատանքի բանակն ենք հաղթ.  
Բանդում ենք այժմ աշխարհը հին,  
Կերտում ենք նոր արեվ ու բախտ...

Այսոր մե՛րն ե աշխարհը վառ,  
Աշխարհը նոր, կարմիր յեվ ալ.  
Չորս ծեգերի հովերի հետ  
Ուզում ենք մենք յերգել, հեվալ...

Հայացքը մեր՝ արեվներին,  
Այսոր իջանք փողոցը մեծ,  
Ուր, մայթերի վրա յերեկ  
Մայր զրկանքը մեզի ծնեց...

### 2

Ալերպուլումը հին:  
Մայիս—քսան թվին:  
Յեվ դասակարգը մեր—  
Հին աշխարհին՝ վոսոխ...  
Խրոխտ շարքերը մեր  
Հուժկու գրոհ տվին,  
Վոնց վոր լավա հրե—  
Սարիցը վար հոսող...

Զրահագնացքը զիւ  
Հզորահունչ գնդաց  
Կայարանումն անբուն—  
Մայիսյան ցուրտ մի որ...

Յեվ Ալեքսանդր հին—  
Բռունցքի տակ ամբած,  
Լսեց սրտումն իր խոր  
Պայքարի յերգ մի նոր...

Սրտումը մերկ յերկրի—  
Ցավագալար ու մութ,  
Հրավառվեց կյանքի  
Կարոտանքը հանգած...  
Բանվորական շարքերն  
Աշխատանքի հմուտ—  
Յերկաթակուռ կամբով  
Վոտքի յելան հանկարծ...

Քաղաքներում, գյուղում,  
Դեպոներում, հանրում  
Յեվ ամենուր, ուր վոր  
Քրտինք եր, մահ ու սով,  
Հոգիները հազար  
Սպասումով անքուն—  
Շողջողացին նորից  
Ազատ կյանքի հուսով...

Մայիսական այն որ—  
Հին հնամյա յերկրում,  
Վոնց վոր հրե մի սուր  
Գիշերվա մութ սրտին...  
Դարը կիսվեց կտրուկ,  
Դարը դարձավ յերկու.  
Յեվ ալ արյուն հոսեց  
Ծնված դարի շրթին...

Յեվ հազարներ յելա՛ն,  
Վրիժավառ յելա՛ն—  
Մոլուցքի դեմը բիրտ—  
Բռունցքները գնդած...  
Ե՛լս, ընկերներ իմ լավ,  
Վոր վերք առին, մեռան,  
Վերջին շնչումն իրենց  
Յերգը խրոխտ թնդաց...

3

Մայիսն յեկավ նորից,  
Յեկավ ալվառ, խնդուն.  
Փովեց յեռուն ու ժիր  
Մեր աշխարհի վրա...  
Աշխատանքի, կովի  
Նոր յերգեր են թնդում  
Հոգիներումը մեր,  
Ծալքերումը նրա...

Մայիսակա՛ն իմ յերգ,  
Յե՛րգ իմ հույզով զեղուն,  
Վոր հյուսվել ես կյանքին,  
Աշխատանքին, հողին...  
Հնչիր ազատ ու զիլ  
Յեվ տարածվիր հեռո՛ւն,  
Ձուլվիր մարդուն կերտող,  
Ձուլվիր լույսին, շողին...

Ժպտուն, փարթամ, շողջող  
Նորից մայիսը յեկավ.

Զրահագնացքը կուռ —  
Զինված կամքով համառ  
Սուրում ե գիլ թռչում  
Դարի համպով յերկար,  
Դեպի աշխարհ մի նոր—  
Միլիոնների համար:

Զրահագնացքը մեր—  
Զրահված հզոր ուժով,  
Քանդում ե կյանքը հին,  
Նոր աշխարհ ե կերտում...  
Յեվ հայացքն իր վառված—  
Մութ խորշերը խուժող,  
Շողշողում ե պայծառ—  
Իր հաղթական յերթում...

Յեվ սուրում ե թափով  
Յերկաթագծի վրա.  
Դարերը ծեր, զառամ  
Թողնում հեռու, յետեվ...  
Յեվ դասակարգը մեր  
Մեքենավար նրա—  
Լարել ե կամքը կուռ,  
Հույզեր, մկան ու թեվ...

Կայարանից կայան,  
Առաջ, հեռու-հեռուն,  
Զրահագնացքը կուռ  
Թռչում ե զոռ յերգով...

Յեվ դասակարգը մեր—  
Կյանքի տենչով յեռուն,  
Կկերտի նոր աշխարհ  
Յերկաթակուռ ծեռքով...

3

Մեր աշխարհում— մայիս ու շող,  
Մեր աշխարհում— յեռանդ ու յեռք,  
Արեվափայլ յերանգ ու յերգ.  
Մեր աշխարհում— մայիս ու շող,  
Նոր դարերին պատգամ հուշող  
Միլիոն հույզեր, մկան ու ծեռք.  
Մեր աշխարհում— մայիս ու շող,  
Մեր աշխարհում— յեռանդ ու յեռք...

Հեռվում դեռ կան այնքա՞ն վայրեր—  
Ուր մայիսն ե արյուն, վառող.  
Ազատ կյանքի այնպե՞ս կարոտ—  
Հեռվում դեռ կան այնքա՞ն վայրեր:  
Ուր կան մարդիկ, վորդիք, մայրեր—  
Արեվազուրկ, ցասկոտ, աղոտ.  
Հեռվում դեռ կան այնքա՞ն վայրեր—  
Ուր մայիսն ե արյուն, վառող...

Մենք քայլում ենք խիտ շարքերով—  
Մենք ու նրանք՝ դեպի գալիք—  
Վորպես շաչող հսկա ալիք—  
Մենք քայլում ենք խիտ շարքերով:  
Աշխատանքի գիլ զարկերով  
Մենք կփռենք լույս ու բարիք.  
Մենք քայլում ենք խիտ շարքերով—  
Մենք ու նրանք՝ դեպի գալիք...

Քանի՛ւր դեռ կրնկնեն գետին  
Այս պայքարումը վճռական.  
Մինչ հաղթանակը վերջնական—  
Քանի՛ւր դեռ կրնկնեն գետին:  
Յե՛վ կուղեկցեն մեր մեծ յերթին  
Դեռ քրքիջները շնական.  
Քանի՛ւր դեռ կրնկնեն գետին:  
Այս պայքարումը վճռական...

Կտատանվեն ճամպի կեսին  
Շարքումը մեր քանի՛ւր դեռ.  
Քանի՛ վախկոտ ու մեղկ սրտեր  
Կտատանվեն ճամպի կեսին:  
Յե՛վ կերազեն որերը սին  
Ու կփռեն քանի՛ ստեր.  
Կտատանվեն ճամպի կեսին  
Շարքումը մեր քանի՛ւր դեռ...

Հաղթանակովը վերջնական  
Մենք կջնջենք ցավ ու դավեր.  
Կխորտակենք խարխուլ նավեր —  
Հաղթանակովը վերջնական:  
Յերթումը մեր մեծ, վճռական—  
Մենք կփռենք կյանք ու ավեր.  
Հաղթանակովը վերջնական  
Մենք կջնջենք ցավ ու դավեր...

1920 թ. — Ղրիժ

Հ. Ս. Խ. Հ.

Պանզնել ես այսոր խրոխտ,  
Տիտանի նման, վեսկա՛մ.  
Հագել ես շողշող շորեր—  
Ալ ու վառ, բոցով վառված.  
Տվել ես հին հուշերիդ  
Մահատու վերջին հարված,  
Յե՛վ հիմի հաղթ ու ժպտուն  
Կանչում ես. — Տեսե՛ք, յես կա՛մ:

Գլխարկդ թե՛ք ես դրել  
Ու վրան աստղեր հրթե՛վ.  
Թե՛վերդ վեր ես քշտել,  
Իջել ես կյանքի կրկես.  
Կենսատու ջուր ես հորդուն—  
Սրտերին տապ ու հրկեզ,  
Կարմրաշող հուր ես հիմա  
Յե՛վ համակ բոց ու հրդեհ:

Բացել ես սահմաններիդ  
Աշխարհի հեռվի հեռուն,  
Չուլվել ես հոգովդ անդարձ  
Աշխարհի շաչող շնչին.

Քանդել ես Մասիսը հին —  
Առասպել չար ու չնչին,  
Յեզ հիմի փորպես Վեզուզ  
Ժայթքում ես լավա յեռուն:  
Յեզ յեթե ցանկաս հիմի—  
Արեվը յերկնի ծոցից  
Կպոկես բազկովդ կուռ,  
Կփռես յերկրի վրա.  
Արեվի արո՛ւ զավակ  
Դու՛ սերված ցեղից նրա—  
Մութ խորշերն ու խավարներ  
Կշողան քո թեժ բոցից:  
Բանվորներ բրոնզաբազուկ,  
Աժդահա և հրաչվի—  
Զարնում են մուրեղով հզոր  
Զնդանիդ, մեծ զարբնո՛ց.  
Բանվորները քո՛ դարբին՝  
Բոցել են քո բորբ հնոց,  
Կերտում են նոր գործիքներ,  
Վոր հինը անդարձ խաչվի:  
Կանգնել ես այսոր խրոխտ,  
Տիտանի նման, վեսկամ.  
Հագել ես շողշող շորեր —  
Այ ու վառ, բոցով վառված.  
Տվել ես հին հուշերիդ  
Մահատու վերջին հարված.  
Յեզ հիմի հաղթ ու ժպտուն  
Կանչում ես.—Տեսե՛ք, յես կամ:  
1922—Յերևան

## ԱՐՏԵՐԸ

Արտերը ծլել են, արտերը կանաչ են,  
Արտերը շնչում են.  
Արտումը յերգեր կան, նրանք ինձ նանաչ են,  
Ու բարձր հնչում են...

Արտերը փռվել են, անափ ու անծեր են,  
Խալու պես բացվել են.  
Յերկինքը շաղել է, ամպերը անցել են,  
Ծիլերը թացվել են...

Արտերը ծովի պես, ծիծաղում, ծփում են,  
Ծափում են հովիցը.  
Ծիլերը ծարավ են, ծիլերը ծծում են  
Ծծերը հողիցը...

Արտերը հեփում են, արտերը հղի յեն,  
Նազում են արտերը.  
Վառ բերկրանքով լի յեն, վոսկեծամ տղի յեն  
Սպասում արտերը ..

Տրակտորը վազել է արտերի սրտումը,  
Յերգել է, հերկել է.

Արեւը զարկել ե՛ր շիկ ժպիտ շրթումը,  
Յեւ հերկը ներկել ե...

Յեւ ամեն մի ծիւր մեր յերկրի արտումը  
Ժպտավառ յեւ տար ե.  
Հին աշխարհի դեմը՝ մոլեգին մարտումը  
Մահատու գնդակ ե...

Արտերը ծլել են, արտերը կանաչ են,  
Արտերը շնչում են.  
Արտումը յերգեր կան, նրանք ինձ հանաչ են,  
Ու բարձր հնչում են...

1928—Յերևան



## ԶԱՆ, ՍԱՎԵՏԻ ՅԵՐԿԻՐ

— Գարունն եկավ, Մարո՛ ջան,  
Արեւն ելավ վառուն,  
Կրկնում են, յարո՛ ջան,  
Սառն աղբյուրներն, առուն.  
Մեր սրտերն ել, Մարո՛ ջան,  
Վոնց վոր ծաղկած գարուն.  
Ես ի՛նչ անուշ ու վառ ես,  
Զա՛ն, Սավետի՛ յերկիր:

— Արեւն ելավ, Սարո՛ ջան,  
Պաչեց դռը սարի,  
Տրակտորը, յարո՛ ջան,  
Գշի՛ր, դեսը արի,  
Թեւրդ բշտիր, Սարո՛ ջան,  
Մեր արտերը վարի՛.  
Ես ի՛նչ անուշ ու վառ ես,  
Զա՛ն, Սավետի՛ յերկիր:

— Գարունն եկավ, Մարո՛ ջան,  
Զները վողջ հալվան.  
Մեր դաշտերը, յարո՛ ջան,  
Ծաղկունքներով արվան.

Տրակտորներ, Մարո՛ ջան,  
Կապած շարքով քարվան.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

— Ջա՛ն կոմսոմոլ, Մարո՛ ջան,  
Տրակտորը յերգեց.  
Վազ տվեց զիլ, յարո՛ ջան,  
Արտերը մեր հերկեց.  
Արեվն առավ, Մարո՛ ջան,  
Հողը վոսկով ներկեց.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

— Ջահել ես դու, Մարո՛ ջան,  
Վոնց վոր կարմիր խնձոր.  
Սշխատում ես, յարո՛ ջան,  
Արտերումը հնձվոր.  
Դու մեր գեղին, Մարո՛ ջան,  
Արեվի շող վոնց վոր.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

— Ջա՛ն կոմսոմոլ, Մարո՛ ջան,  
Բաղրումն ուտում առար.  
Գութանիցը, յարո՛ ջան,  
Խռով կացար, սառար.  
Գեղը յեկար, Մարո՛ ջան,  
Տրակտորիստ դառար.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

— Մեր գեղումը, Մարո՛ ջան,  
Կինքաժին ես դառել.  
Սաղ կանանցը, յարո՛ ջան,  
Ժողովի յես տարել.  
Հին աղաթը, Մարո՛ ջան,  
Վոտնատակ ես արել.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

— Գեղխորհրդում, Մարո՛ ջան,  
Նստել ես դու ժողով.  
Յերեսրդ թուխ, յարո՛ ջան,  
Արեգական շողով.  
Կուլակները, Մարո՛ ջան,  
Բռնվել են դողով.  
Ես ի՛նչ անուշ ու վառ ես,  
Ջա՛ն, Սավետի՛ յերկիր:

1928—Յերեան

Լ Ե Ն Ի Ն

1

Հիմի, աշխարհի ամեն մի մասում  
Շրջում ե նա մի՛շտ ու մի՛շտ,  
Այնտեղ, ուր մարդու բրտինքն ե հոսում,  
Ուր վոր զրկանք կա ու վիշտ:

Հիմի, այս ժամին Ռուրում, Մադրիդում  
Յեվ կամ Փարիզում, այլուր—  
Հգորահգոր գորանցքն են դիտում  
Ռազմագնդերի հարյուր:

Մոտենում ե նա շարքերին շաչող,  
Շարքերին խոժոռ, անոթի,  
Վողջույն ե տալիս մտերիմ կանչով,  
Վոնց վոր հնամյա ծանոթի:

Յեվ շնջում ե նրանց ականջին  
Խոսքեր վառ՝ լուսե գալիքի,  
Ու ծայնակցում են նրա գոռ կանչին՝  
Շարքերը հուզվող ալիքի...

2

Հիմի, աշխարհի ամեն մի մասում  
Շրջում ե նա մի՛շտ ու մի՛շտ,  
Ուր վոր վառողն ե վորոտով խոսում,  
Հորդում ե արյուն ու վիշտ:

Մեծ քաղաքների լայն փողոցներում,  
Բարրիկադների վրա,  
Մարտնչող, չարքաշ շարքերի բոցում  
Հնչում ե ծայնը նրա:

Վոնց վոր յերկնքիցն ամպրոպը պայթի  
Թնդում ե ծայնը համառ.  
— Դե յելի՛ր, աշխարհ մրի, զրկանքի,  
Կռվիր նոր կյանքի համար:

Անցնում են շարքեր, զենքերն են փայլում,  
Մարտագոռ յերգ են յերգում.  
Յեվ առաջապահ Լենինն ե քայլում,  
Ալիուր դրոշակը ձեռքում...

3

Հիմի, աշխարհի ամեն մի մասում  
Շրջում ե նա մի՛շտ ու մի՛շտ,  
Ուր վոր Նիրվանան որոր ե ասում,  
Ուր վոր հաշիշ կա ու վիշտ:

Յես նրան տեսա Աֆրիկումը լուռ,  
Հինդում, Իրաքում, Չինում,

Հին Արեւելքի հոգիները բյուր  
Վրեժի ուումբով եր զինում:

Յեւ ամեն լեզվով սալամ եր տալիս  
Խալխին տառապող, տրտում.  
Թե Հոկտեմբերը ձեզ մոտ ե գալիս,  
Վոր շողա ձեր մեծ սրտում:

Տեսա, ել Շարբի խալխը հիացած,  
Ցնցվեց ու վոտքի յելավ.  
Նոր կյանքի տենչով կուռ ու միացած  
Յեւ հորդեց վոնց վոր սելավ..

4

Այն ո՞վ ե նստել խարխուլ խրճիթում  
Հնդիկ գյուղացու, այն ո՞վ  
Անհող հնդիկին այն ի՞նչ ե պատմում  
Մտերիմ յեւ կուռ ծայնով:

Այն ո՞վ ե շրջում շաչող Շանհայում,  
Անցնում Պեկինից Կանտոն.  
Կուլինների հետ այն ո՞վ ե բայլում  
Վեռական, քմբոստ, անտուն:

Այն ո՞վ ե վառել խարույկ մի հզոր  
Հին Արեւելքի սրտում.  
Այն ո՞վ ե բոցել վառ հրդեհ հսոր  
Բյուր հոգիների ցրտում:

Թնդացին հանկարծ աշխարհումն անծայր  
Ձայները միլիոն յեւ մին.  
— Միլիոնից ծնված, միլիոնի հանճար  
Լենի՛նն ե, Լենի՛ն, Լենի՛ն...

5

Մեր նոր աշխարհի ամեն մի մասում  
Շրջում ե նա մի՛շտ ու մի՛շտ.  
Ուր վոր ջրերն են ջրանցքով հոսում,  
Ուր աշխատանքն ե անվիշտ:

Հիմի մեր յերկրի նոր զավոզներում,  
Գործարաններում կանգուն  
Իլիչը կանգնած դատում ե, դիտում  
Հայացքովը սուր, անբուն:

Կոպեկ ու կոպեկ հաշիվ ե անում,  
Վիճում ե, պնդում համառ.  
Փաստեր ե կիտում, թվեր ե հանում  
Աշխարհի բախտի համար:

Հիմի մեր գյուղը ելեկտրոլուսով,  
Իլիչն ե շրջում գյուղում.  
Գյուղը բշել ե տառապանքն ու սով,  
Շոգեգութանն ե յուղում...

6

Մեր վառ աշխարհի ամեն մի մասում  
Շրջում ե նա մի՛շտ ու մի՛շտ,  
Ուր հազար-հազար մանկիկներ հասուն  
Այժմ խլրտում են անվիշտ:

Պիոներական զնդերն են հուզված,  
Թմբուկն և թափով թնդում.  
Իլիչը հիմի շարքերին ձուլված—  
Յերգում ե, հուզվում, խնդում:

Յեվ փոքրիկ-փոքրիկ հոկտեմբերիկներ—  
Դեռ թոթով, թիթեռ, անո՞ւժ.  
Լենին պապիկը ժպտում ե հետներ  
Ու շոյում նրանց անո՞ւշ:

Դու թուխ ու թոթով թմփրիկ թմբկահար,  
Թող թմբուկդ թունդ թնդա՛,  
Իլիչի հետը թող սավետական  
Մեր լայն աշխարհը խնդա...

7

Կարմիր հրեմլի պատի տակը ծիգ—  
Կրասնի Պլոշչադի վրա,  
Կանգնել ե ահա գերեզման հրծիգ,  
Այնտեղ — մարմինը նրա:

Կարո՞ղ ե միթե գերեզմանը այն  
Տեղ տալ Իլիչին հսկա.  
Կարո՞ղ ե թեկուզ մեր աշխարհը լայն  
Իր նեղ լինելը չզգա:

Դասակարգը մեր՝ միլիարդ ու ավել,  
Լենինը — միլիարդ — հանո՞ւր.  
Յեվ ո՞վ կարող ե միլիարդը թաղել  
Յեվ ինչպե՞ս թաղել կամ ո՞ւր:

Հիմի աշխարհի ամեն մի մասում  
Շրջում ե նա մի՛շտ ու մի՛շտ,  
Այնտեղ, ուր վոր կա տանջանք ու ցասում,  
Ուր կա աշխատանք անվիշտ...

1926—ԹԻՖԼԻՍ



## Մ Ե Ն Ք

Մենք նո՛ր ենք, մե՛նք—պոետներ ջահել,  
Մեր մուսան դասակարգն ե, շոգին.  
Բռնել ենք ելեկտրավառ ջահեր  
Յեվ վառում հին աշխարհի հոգին...

Յես մենակ՝ որերի դեմ—չնչին.  
Մենք ամենքս մեկտեղ—հզոր մի տոկ.  
Մեր հազար յեվ բյուր հազար շնչին—  
Մի լեզու, մի զարկերակ, մի թոր...

Բեթհովենը ստվեր ե անուժ  
Մեր վաղվա յերգերի դեմ հսկա.  
Կհնչի վաղը մեր յերգն անուշ,  
Աշխարհը հուզանք ու զանգ կզգա...

Մենք նո՛ր ենք, մե՛նք—պոետներ ջահել,  
Մեր մուսան դասակարգն ե, շոգին.  
Բռնել ենք ելեկտրավառ ջահեր  
Յեվ վառում հին աշխարհի հոգին...

1923 - 1. հունիսական

## ՅԵՐԿՐՈՐԴ ՄԱՍ

Ջ Ա Ն, Ա Ր Ե Վ Ե Լ Բ

Խորասանու խաս խալու պես՝  
Հազար գույնով փռվել էս դու,  
Շող ու շափրան, ալ ու նարինջ,  
Վոսկեյերանգ, ջա՛ն Արեվելք:  
Իմ արեվգիր ու արնագույն  
Նոր գրքումը գրվել էս դու,  
Իմ յերգի շունչ, իմ հոգու հույզ,  
Իմ կյանքի լույս, ջա՛ն Արեվելք:

Սրտումդ ջերմ՝ քանի՛ լավա,  
Քանի՛ արեվ, քանի՛ կրակ,  
Արեվածին, արեվամայր,  
Արեվաշող, ջա՛ն Արեվելք:  
Հոգումդ հուր՝ քանի՛ խորհուրդ,  
Արնոտ գրքի քանի՛ պրակ,  
Դու նոր դարու հսկա՛ շայիր,  
Դու մեծ հանճար, ջա՛ն Արեվելք:

Գիշերների դու վառվառ ջահ,  
Ջան ու ջահել, ջիվա՛ն էս դու,  
Դու կարմրաբաշ արու ծնող,  
Խոր յերկունքով, ջա՛ն Արեվելք:

Խոր վերքերի ու հեվքերի,  
Նոր յերգերի դիվանն ես դու,  
Հազար տաղով, հազար խաղով,  
Շող ու շաղով, ջա՛ն Արեվելք:

Յես քո վորդին—պոետը քո,  
Բարձր ու հպարտ գովքդ յերգեմ,  
Հրե փառքով, կարմիր վառքով,  
Բարձրաթոխիչք, ջա՛ն Արեվելք:  
Յես քո տիտան ու շառաչող  
Մեծ պայքարի թո՛վքը յերգեմ,  
Առյուծաբաշ, հաղթ ու կրքոտ,  
Իմ գովական, ջա՛ն Արեվելք:



## Ի Մ Յ Ե Ր Գ Ը

## 1

Իմ յերգը ցնորք ու յերագական չի.  
Իմ յերգը նրբահյուս ու նազական չի'.  
Սուլթանի դիվանին նա սազական չի':

Յերգերս հյուղերումն եմ ուսել յե՛ս.  
Հազար հուր սրտերիցն եմ հյուսել յե՛ս.  
Շանթերի շողոցովն եմ լուսել յե՛ս:

Իմ շարած բառերի մեջ մուգ արյո՛ւն կա.  
Յեվ գալիք հաղթանակ ու գարուն կա.  
Բարձրականչ, համարձակ եմ խոսո՛ւմ յե՛ս:

Իմ յերգում հորձանքներ ու հողմե՛ր կան.  
Յեվ զարթնող աշխարհի չորս կողմե՛ր կան,  
Մրափած մրրիկներն եմ հուզում յե՛ս:

Ջարդում եմ աշխարհը հինով լի'.  
Փարչերը քնաբեր գինով լի'.  
Յերգովըս ձեր սրտումն եմ հոսում յե՛ս:

Ե՛յ, յե՛րգ իմ, աշխարհը մեծ դիվանդ ե.  
Իիվանր թող լսի քեզ, վոր հիվանդ ե.  
Աշխարհի լուսաբացն եմ ուզում յե՛ս:

Իմ յերգը ցնորք ու յերազական չի՛.  
Իմ յերգը նրբահյուս յեվ նազական չի՛.  
Վոսկեզոծ դահլիճին նա սազական չի՛:

2

Այս գարունը գյուլխատանին ի՞նչ:  
Այս գարունը վարդի գովքին չի՛:  
Յարն ու գինին այժմ հորանջնն թող:  
Այս գարունը սիրո թովքին չի՛:

Խայամը վարդի յերգիչ ե.  
Իսկ այսոր պայքարի կանչ կա ..  
Պայքարումը վարդի յերգն ի՞նչ ե:  
Հափրզի գինու յերգերը,  
Արեվե՛լք, քեզ համար քիչ ե...

Շաչ են  
Հիմի  
Չորս գետերդ.  
Ծուփ ես  
Հիմի,  
Դու ծփանք ես.  
Շանթ ե  
Հիմի  
Բաց յեթերդ,  
Արեվե՛լք,  
Իմ յերկիր:

Արեվե՛լք,  
Արնոտ յերկի՛ր իմ,  
Քեզ քանի՛ անգամ մորթիլ են...  
Այսոր  
Արար ու վարար ես.  
Այսոր  
Հույզերդ հորդել են...

Տաքիլի յերգերը չկան ել.  
Հիմի վրեժի-հորձանք ես.  
Հիմի հնի դեմ փորձանք ես.  
Հիմի մրրկի հոսանք ես:

Կրծքումդ սրբկահունչ դողանջ կա:  
Ղողանջդ լսող հազար ալանջ կա:  
Ըմբոստ վորդիներդ զորականչ կա,  
Արեվե՛լք, ի՛մ յերկիր:

Իմ յերգը ցնորք ու յերազական չի՛.  
Իմ յերգը նրբահյուս յեվ նազական չի՛.  
Մահացող աշխարհին նա սազական չի՛:

3

Արեվելքը  
Հո՛ւր ե  
Հիմա,  
Հին  
Ու  
Հինա  
Չի՛:

Արեվելքի կրծքին  
Հիմա—  
Փորել ենք խոր պայթող մինա...

Արեվելքը  
Հուր և  
Հիմա,  
Հին  
Ու  
Հինա  
Չի՛:

Ե՛յ,  
Մուեզգի՛ն,  
Մինարայից ո՞ւր ես կանչում.  
Չո՞ւր ես կանչում.  
— Ալլահ եբբա՛ա՛ա՛ա՛ր,  
Ալլահ եբբա՛ա՛ա՛ա՛ա՛ր:

Այժմ  
Կանչը քո  
Մեր հուր հոգին հուզողը չի՛.  
Ազոթքներում սուզողը չի՛.  
Հաշիշ ծխել ուզողը չի՛  
Մեր հուր հոգին...

Արեվելքը  
Հուր և  
Հիմա,

Հին  
Ու  
Հինա  
Չի՛:

Իմ յերգը ցնորք ու յերազական չի՛.  
Իմ յերգը նրբահյուս յեվ նազական չի՛.  
Մարմարե քյոշկերին նա սազական չի՛:

1918—Թիֆլիս



ԼՍԻՐ, ԻՄ ԸՆԿԵՐ

1

Լսի՛ր,  
Ի՛մ ընկեր,  
Հորանջող ու դանդաղ քայլերով  
Մի՛ քայլիր,  
Մի՛ քայլիր...

Աշխարհումն ուղտերի կարավան  
Ել չկա՛:  
Աշխարհը  
Վազք է,  
Վազք է  
Հիմի:  
Իսկ դու,  
Ի՛մ ընկեր,  
Հորանջող ու դանդաղ քայլերով  
Մի՛ քայլիր,  
Մի՛ քայլիր...

Հիմի

Անապատումն ել Շարքի

Յերագուն կարավան

Ել չկա՛:

Հիմի

Յեռուն բազարումը Բոմպեյի—

Բեռնատար իշուկին

Գին տվող

Ել չկա:

Հնացե՛լ,

Մնացե՛լ,

Անցե՛լ և

Հիմի...

Արդեն խուլ են,

Խարխուլ են

Ճախարակները փայտաշեն...

Դազգյահը լքված—

Վոնց վոր ծերուկ բեռնակիր—

Իր անճար որն է սգում...

Լսո՞ւմ ես—

Շոգեքարվանն է թռչում:

Հիմի

Նրա յերզն է հնչում:

Աշխարհը նրա պես

Խուլ վա՛զք է,

Վա՛զք է...

Հզոր յերկաթն է զորրնգում

Մեր փողոցում,

Ձեր փողոցում,  
Աշխարհ-փողոցումը մեկ...  
Յերկաթի յերգն ե հնչում—  
Թռիչք ու շառաչ...  
Մրոտ բազուկներն են,  
Վոր հրում են նրան  
Առա՛ջ,  
Առա՛ջ...

Իսկ դո՛ւ,  
Ի մ ընկեր,  
Հորանջող ու դանդաղ բայլերով  
Մի՛ բայլեր,  
Մի՛ բայլեր...

2

Քթախոտ վանառող Ջափարն ասի թող.  
— Աշխարհը բթիս տակն ե միայն...

Իսկ դո՛ւ,  
Ի մ ընկեր,  
Վոր շունչ ես տալիս  
Յերկաթին  
Ու կյանքին,  
Լսի՛ր,  
Աշխարհը մե՛ծ ե,  
Մե՛ծ ե  
Ու մե՛կ,  
Շար-շար ողակներից շաղկապված մի շղթա...

70

Աշխարհը մի նոր հերիաթ ունի,  
Վորը հյուսել են  
Յեվ լուսել են  
Չարքաշ,  
Մրոտ  
Յեվ յերկաթին շունչ տվող մարդիկ...

Ատում ես.  
— Ո՞ւր,  
Ո՞ւր են նրանք:

Նայիր յերկնքին,  
Սահմանն ի՞նչ,  
Նա մեկ ե,  
Մեծ ե ու խոր:  
Այնտեղ աստղերն են շողում  
Շարք-շարք,  
Խումբ-խումբ,  
Հանուր...

Ատում ես.  
— Ո՞ւր,  
Ո՞ւր են նրանք:  
— Ամենո՞ւր են...

Ճիշտ այդպես՝,  
Ճիշտ այդպես աշխարհի վրա փուված  
Բյո՞ւր են,  
Հո՞ւր են,  
Ամենո՞ւր են...

71

Յեղն ի՞նչ,  
Սպիտակ,  
Սեվ  
Կամ դեղինն ի՞նչ,  
Մե՛կ  
Յեվ ամենո՛ւր են...

3

Սագանդա՛ր,  
Սագանդա՛ր,  
Ե՛յ,  
Ձայնը չնգնական չունգուրիդ կանչ չունի՛,  
Ձափ չունի՛,  
Չի լսվում,  
Չե՛:  
Ձայնը չնգնական չունգուրիդ թույլ ե  
Ու թախծոտ ..  
Կլռեն յերգերը չունգուրիդ լալկան...

Չունգուրիդ ճիչը չնգնական  
Ել չի՛ հուզի,  
Չի՛ հուզի մեզ:  
Սիբտը հրթիռ նոր աշխարհի  
Ել չի՛ ուզի,  
Ել չի՛ ուզի  
Հին յերգդ հեզ...

Հողաշխարհում  
Հիմի  
Հանուր,

72

Ամուր,  
Մեկանց  
Շեփորում են շեփորները պղնձաշեն,  
Յեվ շեփորում են  
Խորակա՛նչ  
Ու նորակա՛նչ:  
Ռազմի շեփոր են շեփորում  
Հզորակա՛նչ,  
Ձորակա՛նչ...

Միլիոն պրկված բռունցքները  
Հարյուր փափուկ ձեռների դեմ—  
Ձորակա՛նչ...

Հիմի՛  
Յերկիրը յերկնում ե.  
Հուզանք  
Ու զանգ  
Յերկունք ե մեծ,—  
Վոր գալարվի,  
Վոր գալարվի՛,  
Վոր բարձր ճչա,  
Հեվա՛,  
Ծնի  
Պողպատակուռ անիվների,  
Ելեկտրավառ հանճարների  
Միլիոնակուռ ղեկավարը...

73

Լսո՞ւմ ես,  
 Ի՛մ ընկեր,  
 Հեռու  
 Կամ մոտիկ,  
 Ծանոթ,  
 Անծանոթ,  
 Սեվ,  
 Օպիտակ  
 Կամ դեղին,  
 Ուր վոր կաս,  
 Ուր վոր ես,  
 Ով վոր ես,  
 Լսի՛ր,  
 Հորանջող ու դանդաղ քայլերով  
 Մի՛ քայլի՛ր,  
 Մի՛ քայլեր...

1918—ԹԻՖԼԻՍ



## Ո Ի Ղ Տ

ՆՎԵՐ ԻՐԱՔԻ ԱՇԽԱՏԱՎՈՐՈՒԹՅԱՆ

Յերեկ,  
 Անապատումը մեր անսահման,  
 Ի՛մ ուղտ,  
 Ի՛մ սիրելի,  
 Պարանոցդ վեր պարզած,  
 Ուզում եյիր շեմս-արեվը համբուրել...

Յերեկ,  
 Ովագիտումն ել Սամի,  
 Ի՛մ սրտակից,  
 Ի՛մ մտերիմ,  
 Գիշերները յես ու դու  
 Յերկնքի փերուզատառ գիրքն եյինք կարդում:

Հիշում ես,  
 Չե՞ս,  
 Վոր յես համբուրում եյի քեզ,  
 Աչքերը քո,  
 Ի՛մ ընկեր,  
 Ի՛մ սիրելի:

Իմ աշխատանքի  
Ու համպաների ընկեր,  
Հիշում ես,  
Ձե՞՞,

Վոր քրտինք եյինք թափում  
Յես ու դու—  
Ինձ ու քեզ  
Յեվ ամենքի համար...

Այսոր,  
Պարանոցդ վեր չես բռնում,  
Ինչո՞ւ:

Այսոր,  
Յերթըղ—մտամոլոր:  
Քայլերդ—դանդաղ:  
Ինչո՞ւ:

Այսոր,  
Ի՛մ սիրելի,  
Կարոտ չե՞ս շեմս-արեվին,  
Ինչո՞ւ:

Այսոր,  
Ո՞վ քեզ խլեց  
Ու բաժանեց ինձանից.  
Ինչո՞ւ,  
Ինչո՞ւ...

Պարանոցդ ծռած,  
Հայացքդ մոլոր ու մոլթ—

Ավազներին,  
Ո՞ւմ վոտքի հետքն ես վորոնում..

Ինչո՞ւ,  
Սիրելիս,  
Հայացքիդ մեջը թախիժ կա,  
Անասող գիշեր  
Ու բարկություն...

Ի՞նչ,  
Ոտար վոտների հետքե՞ր կան  
Ավազների վրա...  
Հարազատներիդ արյան շիթե՞ր կան  
Ավազների վրա...  
Այն վո՞ր ոտարականն եր նենգաժպիտ,  
Վոր վոտք դրեց շեկ ավազների վրա...  
Ու հարազատներիդ արյան շիթե՞ր կան  
Ավազների վրա...

Մեր արեվակեզ անապատներում,  
Այսոր,  
Հեռավոր ծովերի խոնավություն կա,  
Յեվ վոռնոցը հեռավոր ցամաքների...

Մեր անապատներում  
Ոտարականներ կան  
Ծովերի հեռավոր համպաներով յեկած...  
Ցամաքից ցամաք են անցել նրանք,  
Ծովից ծով են անցել  
Ու յեկել,—  
Ծովերից,

Ուր ջրշուններն են լողում:  
Ու մեր անապատների  
Բորենիներին միացած,  
Մարմինդ հոշոտե՞լ են ուզում,  
Սիրելի՛ս:

Այն ո՞վ եր,  
Վոր ծանր բեռ դրեց կունակիդ:

Ի՞նչ,  
Հիմա համբույրիս փոխարեն  
Ոտարնե՞րն են քեզ մտրակում,  
Սիրելի՛ս:

Պարանոցիդ հպարտությունն ո՞վ կտորեց:  
Ի՞նչ,  
Ոտարները քեզ գրա՞ստ են կարծում...

Ասա՛,  
Սիրելի՛ս,  
Իմ քրտինքի,  
Պայքարի,  
Հրեվանքի  
Ու ճամպաների ընկեր,  
Յե՞րբ,  
Յե՞րբ վերջապես  
Թաղես պիտի ավազների տակ  
Ոտարի բեռները ծանր...

Յե՞րբ,  
Յե՞րբ վերջապես  
Պիտի կայծակի հայացքդ մոթ...

Յե՞րբ,  
Յե՞րբ վերջապես  
Պիտի սողան հայացքիդ առաջ  
Բորենիներն անապատիդ հայրենի...

Յե՞րբ,  
Յե՞րբ վերջապես  
Ցեսնեմ պիտի  
Պարանոցդ արեվին պարզած  
Դո հողմածուփ  
Ցեվ շոգեկանչ նոր անապատների մեջ...

Յե՞րբ,  
Յե՞րբ,  
Յե՞րբ,  
Սիրելի՛ս:

1921—Բաղդադ

## Յ Ե Ր Կ ՈՒ Ս Ե Ր

### 1

Ջեմիլե,  
Մետաքս ու շղարշ շորերով  
Կշորորաս դու:

Գունատ ու մերկ մարդիկ գործեցին  
Մետաքսն ու շղարշը բո...

Անսեր աղջիկներ նստած անբուն  
Գիշեր ու ցերեկ,  
Ցերեկ ու գիշեր—  
Կարեցի՞ն,  
Կարեցի՞ն,  
Կարեցի՞ն,  
Կարեցի՞ն  
Իրենց մատներովը մոմե...

Ջեմիլե,  
Վզիդ մարգարտե շա՞ր ես կապել:

Մարգարիտներդ  
Հատի՛կ-հատի՛կ.  
Վորքերի այտերից վար թափվող  
Արցունքների պես  
Հատի՛կ-հատի՛կ...

Ջարդարել ես բազուկներդ անաշխատ—  
Ապարանջաններով վոսկեղեն:

Ապարանջաններդ վոսկեղեն—  
Ո՞ւմ քրտինքն ե այն,  
Ջեմիլե:

Ձի՞՞ ճշում նրբանագ մեջքը բո,  
Ձի՞՞ սեղմում մեջքդ ալմաստե գոտին—  
Իր վորդուն թաղող  
Մոր բազուկների նման...

Մեր քաղաքի սիրունն ես դու—  
Ասում են:  
Ջեմիլե:  
Մեր քաղաքի գարունն ես դու—  
Ասում են:

Սիրունը սուլթանի՞ն միայն պիտի,—  
Ո՞վ ասաց:  
Գարունը վոսկո՞վ են միայն գնում,—  
Ո՞վ ասաց:

Ջեմիլե,  
Վանդակումն ե փակել քեզ բո տերը,  
Վոսկով ե զնել քեզանից բո սերը...

Դուրսը

Ազատ աշխարհ կա,

Գիտե՞ս դու...

Գոնե մի որ արեվի շողը տեսե՛լ ես.

Նոր կյանքի ծփանքը լսե՞լ ես...

Ձեմի՛լե,

Վանդակումն ե փակել բեզ բո տերը...

Ձահեղները մեր քաղաքի

Յերդվում են,

Վոր փերինների փերին ես

Ձաննաթից փախած:

Մեր քաղաքի ջահեղներն անաշխատ

Պալատիդ դռան թափառում են

Վորսկան շների պես—

Քե՛ղ համար:

Դո՛ւ

Ծերուկ սուլթանին համբույր տուր,

Փոխարեն արմատ ու հակինթ առ...

Դո՛ւ

Ծերուկ սուլթանին ժպիտ տուր,

Փոխարեն վոսկի ու զմրուխտ առ...

Յեվ հետո թառամիր,

Ինչպես նարզիզն ե թառամում

Ձուրկ շողերիցը շեմսի...

Ձահեղները մեղկ մեր քաղաքի—

Վորսկան շների պես,

Հոտոտան թող,

Ձեմի՛լե,

Փողիները պալատիդ դռան:

Ձահեղները մեղկ մեր քաղաքի

Թող հոտոտան

Այսոր,

Վաղ

Ու հետո—

Կգնան նրանք

Նեղ փողոցի այն յերկհարկանի տունը,

Ուր փափկամիս աղջիկներ

Չնչին արժեքով

Ցնորք ու սեր են բաժանում...

Ձեմի՛լե,

Ձե՞ վոր դու ել

Վոսկով ես գզվում սուլթանին...

2

Մի աղջիկ կա:

Մի աղջիկ կա,

Վոր հոգումը մաղձ ունի,

Աչքերումը—շեմս արեվ...

Գահիրեյից Ալեքսանդրիա տանող

Ճանապարհի վրա

Քարեր ե ջարդում

Յերկաթուղագծի համար:

Արեվի տակ  
Քրտինքը  
Ճակատի վրա ցուլքեր ե տալիս  
Շափյուղաների նման:  
Քարեր ե ջարդում ու քրքջում ե  
Բանվոր քարտաշների հետ:

Նրա կուրծքը վողորկ ե,  
Ինչպես տափաստանն Իրաքի:  
Յեվ յերկու գետեր կենսատու —  
Յեփրատ ու Տիգրիս —  
Հորդում են  
Ու ալեկոծվում այնտեղ...

Արեվի աղջիկ ե նա:  
Զրկանքը բրոնզեկ ե նրան:  
Նոր աշխարհի մայրությունը  
Յեռում ե հոգումը նրա...

Ճանապարհի վրա,  
Ամեն որ,  
Մարդկային իմաստուն կրքով  
Իրար ենք նայում անամաչ...

Որը մթնում ե:  
Լուում ե վարիչի մտրակի շաչը:  
Վերջանում ե աշխատանքը որվա:

Ու մենք,  
Յես ու նա —  
Ասում ենք իրար հուզված:

— Յեկ,  
Աչքի՛ս լույս,  
Գնանք ինձ մոտ,  
Թրջենք հացը ջրով,  
Ընթրենք:  
Յեվ հետո  
Միրենք իրար անգատ,  
Պա՛րզ —  
Արեվի պես,  
Հարեմից հեռու:  
Միրենք իրար աղմկոտ կյանքում —  
Մարդկային իմաստուն սիրով...

1921—Թեհրան



## ՍԹԱՄԲՈՒԼ

Սթամբուլը մի փաշա յեր յերեկ,  
Անունը Ոսման կամ Ալի:  
Յերկու ծովերի արանքում  
Փռել եր նախշուն մի խալի:  
Յեվ ծալապատիկ ծույլ նստած,  
Քաշում եր համրիչը մարջանի:  
Ծխում եր նարգիլեն թամբաբով,  
Շոյում եր մորուքը յերջանիկ:  
Խմում եր կում-կում ու հանգով  
Խահվե՝ ֆարֆուրե ֆինջանից:

Սթամբուլը մի խալիֆ եր խոժոռ—  
Մահմեդի ցեղիցը սերված:  
Կախված ցից բեղիցն ալլահի:  
Ուզեր՝ կղատեր գյավուրին.  
Ուզեր՝ կթամբեր ջորու պես,  
Վոր մեջքին նստած ծանրախոհ—  
Ալլահին նամազ ուղարկեր:

Սթամբուլը յերեկ «ջանր՝մ» եր,  
Հանրմ եր սիրուն, սեվաչյա—  
Կանգնած աշխարհի մեյդանում:

Շատերին իր տունն եր տանում,  
Բանում եր կուրծքն իր հերմակ,  
Կամ վերմակը մահճի կակուղ...

Շատերին ֆալ եր բաց անում,  
Ցանում եր բախա, ժպիտ, հարբանք,  
Ծախում եր աճուրդով եժան  
Թալիսման, համբույր ու տարփանք...

Սթամբուլը մի բարձ եր բումբուլ:  
Նիրվանա: Հաշիշ: Որորանք:  
Մահով, մահիկով մինարա:  
Թամամ համամ եր ու շամամ:  
Շարբաթ եր: Շամպայն ու շանտան:  
Բանկիրը վո՞ր տեղի ու ցեղի  
Զգիտեր շանտանի այն համպան:  
Բանկիրը վո՞ր տեղի ու ցեղի  
Զի հարբել այն շքեղ շանտանում:  
Վո՞ր լորդը թեվանցուկ չեր տանում  
Սթամբուլ հանրմին տաք բաղնիք...

Յերեկ եր:  
Սթամբուլը—հնում:  
Քնում եր:  
Մնում եր խոր քնած:  
Այդ հինը հնումն ե,  
Քնումն ե:  
Յերեկ եր,  
Գնո՞ւմ ե,  
Վոր զնա՞ց...

Կ Ա Լ Կ Ա Յ Ա

Իրիկունն իջավ: Գանգեսի վրա  
Փռվեց մեղմորոր մութե թեվ:  
Արմավենիներն իրիկվա հովին  
Դողացին կամաց ու թեթեվ:

Գանգեսի ափին քաղաքը հսկա—  
Կալկաթան՝ ժխորը սրտում:  
Կալկաթան, ասես, ռաջա մի փարթամ,  
Կալկաթան՝ փաքիր մի տրտում:

Սպիտակ քաղաքը մի դյուլթող հրաշք—  
Ձուգված, չարախինդ յեվ յեռուն:  
Սեվ Քաղաքը միշտ ջրտնող ու մռայլ—  
Հայացքը խոժոռ, սեվեռուն:

Կալկաթան—յերկու բանակներ վոնց վոր,  
Կանգնած դեմ առ դեմ անգիջում:  
Անհաշտ յեվ համառ իրար են նայում,  
Հեվում են, ճշում ու վիճում:

Իրիկունն իջավ: Քաղաքի վրա  
Փռվեց մեղմորոր մութե թեվ:

Սպիտակ Քաղաքը անթիվ աստղերով  
Շողողաց պայծառ ու թեթեվ:

Յեվ Ձորըն Գերոյլդ փողոցը հիմի  
Թվում ե հեքիաթ մի սիրուն:  
Շողում ե, լողում ելեկտրո-գազի  
Հազար ու հազար լույսերում:

Ոթելներ հսկա յեվ ապարանքներ  
Շքեղ, բարձրածիգ, տիրական:  
Ապարանքներում՝ ռաջա ու միստեր,  
Վոնց վոր ջաննաթումն իրական:

Ջաննաթումը՝ կիրք, վիսկի ու շամպայն,  
Կանացի կրծքեր ու զիստեր...  
Ու բեֆ են քաշում տերերը Հինդի—  
Ռաջբումար, ռաջա ու միստեր...

Գիշերը իջավ: Սեվ Քաղաքն ահա  
Պարուրեց կամաց մութը խոր:  
Հյուղերումն անշուք մարեցին մեկ-մեկ  
Լույսերն առկայծող ու ժխոր...

Կանգնած կողք-կողքի հյուղակները մութ,  
Տնակները լուռ յեվ անող,  
Վոնց վոր բախտակից, մի մորից ծնված,  
Իրար հարազատ ու ծանոթ...

Խավարումը խոր անթարթ աչքերով  
Նայում են խոժոռ դեպ հեռուն.  
Նայում են դեպի Սպիտակ Քաղաքը,  
Ուր հանույք ու կիրք ե յեռում...

Այնտեղ մեղկ ռաջան, միտերն ու միան—  
Տերերը Հինդի յեվ վոսկու,  
Իշխում են այսոր, թալան են անում,  
Ժպտում են, հարբում յեվ սոսկում...

Զգում են նրանք, վոր կզա մի որ  
Վրեժի, պայքարի մահատու,  
Յեվ վոտքի կելնի խեղճ խալխը Հինդի  
Հարվածով քանդող յեվ հատու...

Գիշերն և իջել: Գանգեսի վրա  
Փռվել և հիմի մութե թեվ:  
Կալկաթան հիմի հեվում և, տնքում,  
Ժպտում և լպիրշ ու թեթեվ...

1928—Յերևան



### Բ Ո Մ Պ Ե Յ

1

Մով ծովը ծփում և անքուն:  
Բոմպեյի ծովափը՝ յեռուն:  
Շոգեվար նավերն են կանգուն  
Ծովափին մոտիկ ու հեռուն:

Հեռավոր աշխարհից դարձած,  
Բեռները ափին են թափել:  
Յեվ կրկին նոր բեռներ բարձած,  
Մեկնում են հեռավոր ափեր:

Բերել են անհամար բեռներ,  
Վոր Հինդի սրտումը թափեն...  
Վոր Հինդի խեղճ խալխին բռնեն  
Ու մեկին հարյուրմեկ խաբեն...

Յեվ ահա նորից բեռնում են  
Մեծ Հինդի քրտինքը աժան...  
Իսկ Հինդում մարդիկ մեռնում են—  
Ժանտախտից յեվ սովից դաժան...

Բոմպեյը՝ մի մռայլ վկա,  
Հայացքը՝ վրեժի շանթով...  
Ո՛ր, վրեժի սեծ որը կգա,  
Յեվ կիջնի հարվածն իր քանդող..

Յերբ շարժվեն բանակաները կուռ,  
Ո՛ր, այնժամ, յեվ այնժամ միայն  
Կսողան գետնաքարը ու լուռ  
Ռաջբուսար, միստերն ու միան...

Կցնդեն Նիրվանան, Բուդդան,—  
Առասպել հնամյա յեվ սուտ...  
Բանվորները քացի կուտան  
Մաուլուդ Շերիֆին մեղսուտ...

Կլինի հատուցումը մեծ,  
Կլինի տոնական հանդես...  
Ով Հինդի արյունը խմեց,  
Կլինի մոխրացած, անտես...

Մով ծովը ծփում է անքուն:  
Բոմպեյի ծովափը՝ յեռուն:  
Շոգեվար նավերն են կանգուն  
Ծովափին մոտիկ ու հեռուն:

Նավերի թեվերը բարձող  
Յելնում են, իջնում են, դառնում,  
Ծովափիցը արագ դարձով  
Բեռները նավումն են առնում:

Ծովափը հեվում է, վռոնում:  
Բազմություն, անցուղարձ ու վազը:

Ծովափը իրար է խառնում  
Գույները, ցեղերը յեվ ազգ..

Անցորդներ սալիտակ, դեղին.  
Թխամորթ, խառնածին ու սեվ...  
Խառնուրդները ամեն ցեղի,  
Ամեն գույն, ամեն տեսք ու ձեվ...

Վազում են հեվքոտ, վիճում են:  
Ճշում են բարձրածայն յեվ խուլ...  
Ժպտում են իրար, զիջում են,  
Քայլում են հուսահատ, տխուր...

Յես կանգնած հեվքոտ ծովափին՝  
Նայում եմ նավերին բեռնող.  
Նվում է տոթաշունչ քամին,  
Վոնց հնդիկ մի ֆաբիր մեռնող:

Յեվ կանգնած լուռ միտք եմ անում:  
Ծովումը ծփանք ու քամի:  
— Թալա՛ն է, բեռնում են, տանում  
Բեռները քանի՛ ու քանի՛...

Բեռները բարձած տանում են  
Դեպ Բասրա, Մանչեստեր, Մարսեյ:  
Արյունը Հինդի բամում են,  
Ուզում են անպատիժ մարսել...

Յեվ կանգնած ծովափին հիմի,  
Հոգումըս վառ ցասում, ամոթ...  
Հինդը հին՝ խավար բանտ է մի—  
Ժանտատես, մահատու, անող. .

Ե՛յ,  
Բո՛մպեյ,  
Բո՛մբ ես դու:

Հին չինդի սրտում—  
Դո՛ւմ—դո՛ւմ—դո՛ւմ  
Բոմբ ես դու,  
Ե՛յ,  
Բո՛մպեյ:

Թե թնդաս դու թափով—  
Լափող բոցերիդ դիմացողն ո՞վ..

Թե թնդաս դու թափով—  
Ավերն ու դավերը  
Ցեղ ցավերը դառն  
Կդառնան թո՛ղ,  
Ե՛յ,  
Բո՛մպեյ:

Արդե՛ն,  
Արդե՛ն,  
Արդե՛ն  
Վառվում են պատրույգներդ բոմբի...

Կրակ են առել,  
Վառվել են  
Պատրույգներդ բոմբի...

Պատրույգիդ կրակ տվողը—չա՛տ...

Ծովափիդ շարք շարված  
Շոգեթոք նավերիդ մատրոսները,  
Շոգեվազ քարվանիդ մերենավարը,  
Ծխհաններիդ ծուխ տվող բանվորը,  
Վո՞րն առեմ,  
Վո՞րը,  
Ե՛յ,  
Բո՛մպեյ:

Լորդն ու ռաջան ու միան—  
Տերերդ ո՞ճ,  
Վորոնք խոց են տվել քեզ,  
Պիտի սողան,  
Դողան  
Կրունկի տակը 300,000,000-ի:

300,000,000-ի սրտում  
Դո՛ւմ—դո՛ւմ—դո՛ւմ  
Պիտի թնդաս,  
Վորոտաս  
Ու տաս հին չինդին արե՛վ,  
Ե՛յ,  
Դու բո՛մբ,  
Բո՛մպեյ:

Կլինի՛,  
Կլինի այդպե՛ս,  
Վես Բո՛մպեյ:

Գալիք  
Ռմբագրու որերիդ համար,  
Գալիք  
Ամրակուռ նորերիդ համար,  
300,000,000-ի տոնի համար  
Ռմբածիգ յերգ եմ պահել,  
Ե՛յ,  
Դու բո՛մբ,  
Բո՛մպեյ,  
Լենինի յերկրից սալա՛մ ձեզ...

1921.—Մոսկու



## Ի Բ Ա Ն Ն Ա Մ Ե

1

Ղահի յերկրումը  
Սիրատենչ մարդերը—շա՛տ,  
Խայամի սիրտը  
Խորովող յարե՛ր ել կան...  
Գյուլիստանումը  
Նորաբաց վարդերը—շա՛տ,  
Յարի գովքը  
Յերգող թառի լարե՛ր ել կան...

Շահնշահի  
Պալատումը գերիքը—շա՛տ,  
Ալմաստ, մարջան,  
Բյուր թանգազին բարե՛ր ել կան...  
Դալար մարմնով  
Ու կիսամերկ փերիքը—շա՛տ,  
Ոձագալար  
Յեվ նազորոր պարե՛ր ել կան...

Խանի քյոշկումը  
Թառ ու սագ, կանչերը—շա՛տ,

Կնոջ թովքի,  
Գինու գովքի յերգե՛ր ել կան...  
Սեվ աչքերով  
Աղջիկներ ու մանչերը—շա՛տ,  
Հինա դրած  
Ծուփ ծամեր ու ձեռքե՛ր ել կան...

Թեհրանումը  
Վոսկի, արծաթ, լալերը—շա՛տ,  
Խուրմա, բաղամ  
Յեվ քիշմիշի լեռնե՛ր ել կան...  
Խաս խալիչա,  
Քիրմանշահի շալերը—շա՛տ,  
Աբրեշումի  
Յեվ ատլասի բեռնե՛ր ել կան...

2

Շահի յերկրումը  
Թառամած վարդե՛ր ել կան,  
Վիշտ ու թախիծ  
Յերգող թառի լարերը—շա՛տ...  
Շահի յերկրումը  
Կիսաբաղջ մարդե՛ր ել կան,  
Սերի կարոտ  
Յեվ անարեվ յարերը—շա՛տ...

Հարեմներումը  
Մուրոված փերի՛ք ել կան,  
Մահվան դողովը  
Գալարուն պարերը—շա՛տ...

Մութ բանտերումը  
Մահացող գերի՛ք ել կան,  
Ջնդան-բանտերը  
Պարսպված, քարերը—շա՛տ...

Հաց մուրացող  
Աղջիկներ ու մանչե՛ր ել կան,  
Աշխատանքումը  
Կոշտացած ձեռքերը—շա՛տ...  
Արեվատենչ  
Ու վրեժի կանչե՛ր ել կան,  
Քյոշկերի դեմը  
Ծառացող յերգերը—շա՛տ...

Սոված խալիսի  
Ձեռքով հյուսված շալե՛ր ել կան,  
Ծովերից դենը  
Գնացող բեռները—շա՛տ...  
Ծով արցունքից  
Քամված փերուզ, լալե՛ր ել կան,  
Դիակներից  
Կանգնած բուրգեր-լեռները—շա՛տ...

3

Ջահել դու իմ ջա՛ն աղջիկ,  
Ցարփուրե ֆինջա՛ն աղջիկ,  
Գործում ես դու խաս խալի—  
Գարուններ յեվ բանի՛ ամառ...  
Կամար ունքերո՛վ աղջիկ,  
Խումար աչքերո՛վ աղջիկ,

Գործում ես դու խաս խալի  
Շահի ու խանի համար...

Շաֆրան Իրանի՛ աղջիկ,  
Հագած ծիրանի՛ աղջիկ,  
Կարիքն ե դուռդ ծեծում,  
Տանջում ե հոգիդ համառ...  
Տխուր ու թախծո՛ղ աղջիկ,  
Բանվոր ու քաղցո՛ղ աղջիկ,  
Նստիր դազգյահի առաջ,  
Գործիր՝ ապրելու համար...

Որերդ հաշվո՛ղ աղջիկ,  
Տժգույն յեվ մաշվո՛ղ աղջիկ,  
Խալիդ՝ թելերով նախշուն,  
Գուլները պես-պես, անմար...  
Մոմե մատներո՛վ աղջիկ,  
Արեվ վատնելով, աղջի՛կ,  
Գործում ես նախշուն խալի՛  
Փարթամ տերերի համար...

Դու ֆարս ու տոկո՛ւն աղջիկ,  
Դու պարզ ու խոկո՛ւն աղջիկ,  
Մռայլ ես, ինչպես շանթող  
Ամպոտ յերկնքի կամար...  
Դու նոր Իրանի՛ աղջիկ,  
Քեզի յերանի՛, աղջի՛կ,  
Գործում ես հրաշք-խալի  
Գալիք որերի համար...

1921—Քիրմանշահ

## ԼԱՍՏԱՆԱՎՈՐԴՆԵՐ

Ի՞մ լաստ,  
Դողալով մի՛ գնա.  
Շողալով,  
Հողալով գնա,  
Մի՛ դողա:  
Դողալը  
Լքվածների յեվ թուլերի համար ե:  
Յես ու դու միասին  
Մեր հակատագիրն ենք դարբնում:  
Ո՞վ կասի մեզ,  
Վոր յես ու դու հիմարներ ենք...

Հեյ հե՛յ,  
Լաստս ձգել եմ ջրերի վրա,  
Ու ինձ տանում ե:  
Բախտս  
Անհայտ հակատագրին չեմ հանձնի:

Բռնել եմ ձեռներումս ամուր  
Թիերը զույգ:

Ու վարում եմ առաջ  
Իմ լաստն ու բախտը,—  
Իմ հակատազիրը...

Լաստս  
Հորդ գետերի վրա—  
Ինձ տանում ե հեռուն:  
Լաստս տանում ե ինձ  
Դեպ ովկիանն անծայր,  
Ուր թափվում են  
Աշխարհի գետերը բոլոր,  
Աշխարհի բրտինքը բոլոր...

Հիմի,  
Այս ժամին,  
Գիտեմ,  
Բոլոր գետերի վրա,  
Վոր կան աշխարհում,—  
Շողում,  
Լողում են  
Լաստանավեր հազար ու հազար...  
Լողում են առաջ  
Լողվորներ միլիոն  
Ու կրկին միլիոն...

Նրանք,  
Վոր ուժ ունեն բազուկներումն իրենց  
Յեվ հոգիներում՝ բեն.  
Նրանք,  
Վոր գիտեն շարժել թիերն իրենց  
Ճարպիկ ու քաջ,—

Հիմի,  
Այս ժամին  
Ամենքը,  
Ամենուր  
Շողում են առաջ,  
Լողում են առաջ  
Դեպի քրտնողների անծայրածիր  
Ու մրկվող ովկիանը...

Վերջ չկա՛,  
Ծայր չկա՛  
Ու համրանք—  
Հանդուզն լողվորների,  
Լաստանավերի...

Յեվ ամեն մի լաստանավ  
Բեռնած հակերով ցատում,  
Ամբարած լախտահար բռունցքը,—  
Շողում ե,  
Լողում,  
Վոր հասնի մի որ հսկա ովկիանին...

Յեվ այն ժամանակ  
Վա՛յ ջրչուններին,  
Ջրազայլերին,  
Վորոնց կզակները կզգան  
Հարվածները շաչող թիերի...

Հեյ հե՛յ,  
Լաստս ջրերի վրա յեմ ձգել:

Ու համպան գիտեմ յես,  
Այնպես,  
Ինչպես գիտե  
Բանակի հրամանատարը  
Ռազմագծերը թշնամու...

Յեզ մթին գիշերում  
Լսո՛ւմ եմ,  
Լսո՛ւմ եմ  
Հեռավոր գետերի վրա շողացող,  
Լողացող  
Իմ յեղբայրների,  
Սրտակիցների,  
Իմ ընկերների շաչող թիերի զարկը  
Պղտոր ջրերի կրծքին,—  
Իմ ընկերների,  
Վորոնք  
Գալի՛ս են,  
Գալի՛ս են,  
Գալիս  
Ձուլվելու հուզված սրտին  
Մեծ ովկիանի...

1919—Թիֆլիս



## ԱՐԵՎԵԼԲԻ ՓՈՂՈՑՈՒՄ

Շերացած,  
Վերացած  
Ու քնկոտ,  
Լայն ջուրքա հազած իմամի նման—  
Կանգնած ե մզկիթը հնամյա  
Փողոցումն ել Շարքի:

Ինչպես գանկը Հասան-Հուսեյնի  
Հոշոտված,  
Փոշոտված  
Խուլ  
Ու խարխուլ—  
Կանգնած ե մզկիթը հնամյա  
Փողոցումն ել Շարքի:

Մինարան նրա,  
Ինչպես ծուռ ու ժանգոտ մեխ—  
Խրվել ե  
Յերկնքի կրծքին մով:

Հե՛յ,  
Արեվելքը  
Արեվերգ ե հիմի...

Հե՛յ,  
Արեվելքը  
Բարեվերգ ե հիմի...

Փողոցները  
Յեռք  
Ու յերգ են հիմի...  
Ձայների ցանց,  
Հպանք  
Ու ծփանք են հիմի...

Մինարի կոկորդիցը ծուլլ՝  
Թո՛ւյլ ե հնչում.  
—Լա՛ ի՛լ ալլա՛ա՛ա՛հ—  
Իմամի կանչը հիմի...

Դեմ առ դեմ մինարի՛  
Արի  
Ծխնելույզն ե կանգուն ..  
Ծխնելույզը  
Հրծիգ  
Անրուն,  
Վերծիգ...

Ուխա՛ա՛ա՛յ,  
Ծխում ե դալանը շոգեհամ.  
Յեվ հավարած բկում  
Սեվ թուքն ե թքում  
Մինարի զանկին լերկ:

Ամեն առավոտ-իրիկուն,  
Յերբ նորի՛ց  
Ու նորի՛ց  
Ու նորի՛ց իմամ Իդրիսը  
Հորանջում ե մինարից.  
—Ալլա՛հ երբա՛ա՛ա՛ա՛ա՛ա՛ա՛ա՛ր,—

Ծխնելույզն ել աժդահա  
Ահա՛  
Սուլում ե սո՛ւր-սո՛ւր.  
—Մինարա՛,  
Ձո՛ւր,  
Ձո՛ւր,  
Ձո՛ւր.  
Դո՛ւ, դո՛ւ, դո՛ւ,  
Փա՛ս, փա՛ա՛ա՛ա՛ա՛ա՛ս:  
Դո՛ւ, դո՛ւ, դո՛ւ,  
Սո՛ւս, ս՛ս՛ս՛ս՛ս՛ս՛ս՛ս՛ս՛:

Յեվ հանկարծ,  
Ասես,  
Մեկից  
Մինարին տալիս են մի կից:  
Խեղդվում ե հիջը մինարի բկում:  
Իմամն իր կուրծքն ե ծեծում,  
Հեծեծում.  
—Եստափրուլլա՛ա՛ա՛ա՛ա՛ա՛ա՛ա՛ա՛հ:

Ահա՛  
Ձիլ

Սուր  
Սուլում ե սուլիլը ծխնելույզի:

Հիմի՛  
Ել Շարբի ալամը շա՛րք-շա՛րք  
Ջամի գնացողը չի՛,  
Ջամումն աղոթողը չի՛...

Հիմի՛  
Ել Շարբի ալամը շա՛րք-շա՛րք  
Շարժվում ե շտապ  
Դեպի շոգենամազ,  
Դեպի շոգեհանդես վես...

Արեվելքի արեվվառ փողոցում,  
Կանգնած դեմ դեմի,  
Վոնց վոր դուշման,—  
Մինարան բավթառ,  
Իմամ Իդրիսի նման,  
Ծխնելույզն աժդահա  
Մեքենավար Ջամիլի նման—  
Արեվելքի արեվվառ փողոցում  
Կանգնած դեմ դեմի,  
Վոնց վոր դուշման...

Յեվ ամեն առավոտ-իրիկուն,  
Յերբ զառանցում ե  
Անատամ ծերուկը—մինարան,  
Ջահել Ջամիլ—ծխնելույզը  
Ջիզրու յերգում ե

Սո՛ւր-սո՛ւր.  
— Մինարա՛,  
Ջո՛ւր,  
Ջո՛ւր,  
Ջո՛ւր,  
Դո՛ւ, դո՛ւ, դո՛ւ,  
Փա՛ս, փա՛ս ա՛ս ա՛ս ա՛ս ա՛ս:  
Դո՛ւ, դո՛ւ, դո՛ւ,  
Սո՛ւս, ս՛ս ս՛ս ս՛ս ս՛ս ս՛ս ս՛ս...

1923--Թիֆլիս



## ԴԵՐՎԻՇԸ

Հեռու հեռուներից  
Մի դերվիշ յեկավ:

Նրա կոշիկների վրա նստել է դեռ  
Հեջազի արեվատապ  
Ավազների փոշին:

Իջել է նա մեծ սրճատունը քաղաքի,  
Մեծ սրճատունն արաբական,  
Վոր բացվում է նեղ փողոցի վրա:

Շուրջն է հավաքել  
Վոսկրացած,  
Սոված,  
Քրտնող  
Յեվ անոթեվան բազմությունը:

Շուրջն է հավաքել  
Ու պատմում է  
Լեյլու-Մեջնունի սիրո մասին, —  
Թե ինչպես սիրեցին նրանք,  
Իրար սիրեցին  
Ու մեռան...

Հե՛յ,  
Բաբա՛ դարվիշ,  
Մեզ ի՞նչ  
Լեյլու յեվ Մեջնունի համբույրը:  
Մեզ ի՞նչ  
Վարդի յեվ լոտոսի բույրը:  
Մեզ ի՞նչ  
Հուրիների փերիների հրապույրը:

Անցել ես դու  
Շատ ու շատ յերկրներ:  
Շրջել ես դու  
Գանգեսի ափերին ձիգ:  
Տեսել ես դու  
Իրաքի հարթավայրն արեվոտ  
Յեվ գրկախառնումն Յեփրատ-Տիգրիսի:

Հե՛յ,  
Բաբա՛ դարվիշ,  
Մեզ ի՞նչ  
Լեյլու յեվ Մեջնունի յերգը...

Ուզում ենք մենք լսել  
Գանգեսի հառաչի  
Յեվ շառաչի մասին,  
Տիգրիսի ու Յեփրատի  
Արնագույն հոսանքի մասին,  
Արեվելքի  
Անարեվ մարդկանց մասին,  
Հեռավոր աշխարհների  
Փոթորկվող հոգիների մասին...

Հե՛յ,

Բարա՛ դարվիշ,

Մեզ ի՞նչ

Լեյլու յեվ Մեջնունի յերգը...

Նեղոսը,

Գանգեսը,

Տիգրիսն ու Յեփրատը

Բախտընկերներ են...

Չորսն ել ցատում ունեն ու ճիչ ..

Ուզում ենք մենք լսել

Այն տեղերի մասին,

Ուր վորքա՛ն,

Վորքա՛ն շղթայվածներ կան՝

Կյանքի ու մահվան մեջ գալարվող:

Հիմի,

Լեյլու յեվ Մեջնունի յերկրումն իսկ,

Ուր սերն եժան ե այնքան,

Վոր կաչում ե մարդկանց վոտներին,—

Ո՞վ սիրտ ունի

Սեր ու տարփանք տենչալու...

Բոմպեյի ծովափում,

Մանիդայի յեվ Փենջապի բացուտներում —

Հիմի

Չարքաշ,

Գրաստված

Ու մոլեգնող մարդկանց հոգիներում՝

Սե՞րն ե բացել իր շուշանները,

Թե՞ վրեժի,

Ցասման

Յեվ ազատության

Վորոտացող ամպրոպ կա...

Իսկ այստեղ—

Մեր յերկրում,

Ուր յերբեմն

Դահիճ փարավոններն են իշխել,

(Հիմի ել դեռ կա՛ն, դեռ կա՛ն),

Մերը սիրող իմաստակ չես գտնի  
Խրճիթներում կծկված մարդկանց մեջը...

Հե՛յ,

Բարա՛ դարվիշ,

Մեզ ի՞նչ

Լեյլու յեվ Մեջնունի յերգը...

Հիմի մենք կարոտ ենք այն յերգչին,

Վոր

Սեր չլինի՛ նրա յերգը,

Խինդ չլինի՛ թող.

Քուն չլինի՛ նրա յերգը

Յեվ վոչ ել հաշիշ:

Մեզ ուրիշ յերգ պիտի,

Կրակ ու հրեղեն յերգ պիտի...

Յեվ այն ժամանակ

Հազար ու հազար մարդիկ

Գատաղի խրխինջ կարծակեն—

Ինչպես

Ազնիվ նժույզն արաբ բեդվինի,  
Վոր պատրաստվում ե արշավի:

Հիմի մենք կարոտ ենք այն յերգչին,  
Վոր յերբ շրջի Հեջազն ու Փենջապը,  
Իրաքն ու Չինը,

Յերբ շրջի յերկրից յերկիր,  
Հեռո՛ւ ու հեռո՛ւ տեղեր—

Շուրջը հավաքի

Մուրի

Յեզ մրուրի մարդկանց

Յեզ յերգի նրանց

Խրխնջացող

Ու հրաթուիչք նժույզների յերգը,—

Ըմբոստ նժույզներ,

Վորոնք

Այսոր կամ վաղ լուսաբացին

Արշավեն պիտի

Վիշապների դեղին արքայի դեմ...

Հիմի

Լեյլու յեզ Մեջնունի հեքիաթը

Հնացե՛լ ե...

Թող պատմի նրանց

Խրխնջացող նժույզների մասին,—

Վորոնք

Իրենց պողպատե սմբակներովն արդեն

Արագ,

Ամուր

Հանուր աշխարհի գետինն են դոփում...

Հե՛յ,

Բաբա՛ դարվիշ,

Մեզ ի՞նչ

Լեյլու յեզ Մեջնունի յերգը...

1921—Թեհրան



Դ Ր Ա Խ Տ

**Ուրբաթ.**

Խալիֆ Ֆաթիհի յգլխիթում  
Իմամը ծեր  
Մարգարեյի գիրքն ե կարդում:

Հավատացյալները բոլոր  
Հսում են նրան անշշուկ  
Ու շարժում են ջերմեռանդ  
Իրենց գլուխները ծանրաբեռ:

Իմամը կարիք չունի՝  
Թերահավատ ունկնդիրների:  
Իմամը կարիք չունի՝  
Իմաստուն մարդկանց...

Իմամը առատածեռն ե,  
Առատածեռն ե ու բարի,  
Տեղ ե տալիս ամենքին  
Հանդերձյալ լայն աշխարհի  
Դրախտումն յերանավետ.—  
Ուրտեղ  
Հուրիներ-փերիներ պես-պես,

Սպիտակ,  
Խարտյաշ  
Յեվ սեվաչվի—  
Շոյնն պիտի քնքշորեն  
Մորուքը ջրկիր Ֆեյզալի:  
Կամ  
Ոմարի կմախքացած մարմինն  
Պիտի փարվի տարփանքով  
Ջաննաթի աղջիկների  
Սիրուններից սիրունը կրքոտ...

Դրախտումը որորանք կա,  
Վայելք,  
Հեշտանք  
Ու հրաշք,  
Հազար ու մեկ գիշերների  
Հեքիաթները դյուրական. .  
Դրախտումը  
Հուր հարբանք կա,  
Տարփանք  
Ու սեր—  
Կնոջ մարմնի պես տաքուկ...

Դրախտումը յերանական  
Բույրերը նուրբ,  
Անուշավետ  
Գզվե՛ն պիտի,  
Գզվե՛ն պիտի  
Ախուռապան կամ ուղտարած  
Խեղճ ֆեյլահի բիթը—զգվե՛ն...

Դրախտումը արեվաշող—  
Մետաքս շապիկը վռակեծոպ  
Պիտի ծածկի,  
Պիտի շոյի  
Խեղճ Ռահիմի մարմինը մերկ ..

— Բիսմ իլլահ ռահմահ ռահիմ,  
Ալլահ,  
Մուհամմադ,  
Հասան,  
Հուսեյն...

Ծերուկ իմամ մարգարեյի գիրքն է կարդում  
Յեզ լտում են հավատացյալները  
Խոստումը մեծ մարգարեյի,  
Վոր հնչում է իմամի բերնով:

Նրանք,  
Վոր կյանքում որ չեն տեսել,  
Նրանք,  
Վոր ցնցոտիներ ունեն հագին,—  
Ինչպես հարբած՝  
Յերազանքի գիրկն են ընկնում  
Յեզ որորվում են յերազով,  
Ասես,  
Նրանք տեղն ու տեղը  
Նստած են այգումը ջաննաթի. .

— Լա իլ ալլահ,  
Մահամադ ռահի ուլ ալլահ...

Հանկարծ,  
Հանկարծ  
Մզկիթումը  
Մի բարձր,  
Խրոխտ ծայն է հնչում:

Մարդկանց միջիցը աղոթող  
Կանչում է մեկը բարձրաձայն.  
— Լսե՛ք, լսե՛ք, ե՛յ, լսե՛ք դուք,  
Մեր իմամի բերնովն ահա  
Ճշմարտությունն ինքն է խոսում...

Այնպես,  
Ինչպես նա յե պատմում  
Այն աշխարհի դրախտի մասին,  
Ո՛ր, նիշտ այնպես հրաշք-դրախտ  
Յես տեսել եմ  
Յերկրի վրա...

Ահա այստեղ,  
Մեր քաղաքում,  
Ուր  
Մուրացկանների,  
Արտասովորների,  
Աշխատողների  
Ու զրկվածների թիվն  
Անթիվ է,—  
Ահա այստեղ,  
մեր քաղաքում,  
եւ Մաշհուր մեծ փողոցի վրա  
Բարձրանում է պալատը շիք,

Մարմարակերտ՝  
Խալիֆ Ֆաթիհի:

Այնպես,  
Ինչպես իմամն ե պատմում  
Մեզ անձանոթ ջաննաթի մասին,—  
Ո՛ր, ճիշտ այնպես ճշմարիտ ե  
Խալիֆ Ֆաթիհի պալատը մեծ...

Լսե՛ք,  
Լսե՛ք,  
Ահա յե՛վ յես  
Պահապանն եմ այն պալատի—  
Վարձու ստրուկ,  
Ա՛յ,  
Այս գույգ աչքովս տեսել եմ միշտ,  
Հազար անգամ—  
Գեղամարմին փերինները  
Վոսկեբանդակ դահլիճումն այն պալատի...  
Մերկ ու կրքոտ փերինները,  
Վոր ցատկելով ծնկի վրա խալիֆ Ֆաթիհի  
Գալարվում են  
Ճկու՛ն,  
Ու ջե՛րժ,  
Ոճազալար մարմիններով:  
Յե՛վ շոյ՛ում են  
Յե՛վ փաղաքշում  
Խալիֆ Ֆաթիհի  
Յից-ցից,  
Յանցառ,  
Սպիտակ մորուքը...

Իսկ յես շոյվել եմ շա՛տ անգամ  
Հարվածովը տիրոջս մտրակի,  
Փերիններից յե՛վ վոչ մեկը  
Չշոյեց մորուքիս մի թե՛ն անգամ...

Սո՛ւտ ես ասում,  
Իմա՛մ,  
Սո՛ւտ ե...  
Չե՛,   
Իմ հոգին չի զնա յերբեք  
Ինչ-վոր ջաննաթը հեռավոր...

Մտրակը բիրտ  
Թող վոսկորներս չշոյի ..  
Թող չթրջվի կերած հացս  
Իմ արցունքով...

Մենք չենք ուզում,  
Դրախտը հեռավոր...  
Ո՛ր, այս յերկրում  
Դրախտներ այնքա՛ն...  
Դրախտներ այնքա՛ն,  
Վորի դռները փակ են  
Խեղճի առաջ...

Այս յերկրի դրախտին եմ կարոտում:  
Սո՛ւտ ե,  
Իմա՛մ,  
Մի այլ աշխարհ,  
Մի այլ դրախտ  
Չկա՛,  
Չկա  
Մարդու համար...

Ծ Ո Վ Ը

Աֆիոնով մի՛ թմրիր՝ թե տանջվում ես,  
Հաշիշով մի՛ բնիր, յեղբայր իմ...

Ասում ես—

Պղտո՞ր ե կյանքի ծովը:

Լինի՛ թող:

Իսկ դու

Պառկել ես ծովափի՞ն:

Ծովափի յերագիցը քո շահն ի՞նչ

Ավազի վրա ծովափնյա

Անշունչ դիակներ փռվին թող...

Տե՛ս,

Անձիր ծովը

Հորձանք

Ու փորձանք ե...

Ասում ես—

Մա՞հն ե բրբջում հորձանքում:

Լինի՛ թող:

Պայքարի բերկրանքին ծանոթ ես,  
Յերբ կուրծքդ ուռչում ե,  
Հայացքդ թռչում ե...  
Յերբ բազուկդ գույգ  
ձեղքում ե ալիքը վայրագ...

Լա՛վ ե,

Ո՛ր, լա՛վ ե մեռնես հորձանքում,

Բան թե ձգված ծովափին

Ծանր ու ծուլ անրջես...

Աֆիոնով մի՛ թմրիր՝ թե տանջվում ես:

Հաշիշով մի՛ բնիր, յեղբայր իմ...

Ծածուկ ծմակից,

Ծերպերից,

Ծանոթ,

Անձանոթ ձորերից

Վտակներ վարար,

Գետեր փրփրաբաշ,

Ջրվեժներ շաչող—

Մեկ-մեկ,

Կողք-կողքի

Գալի՛ս են,

Գալի՛ս,

Հսկա աշխարհի լայն տափաստանում

Իրար են ձուլվում

Ծափ ու ծփանքով

Յեվ շառաչում են հուժկու,

Միասին...

Թեվիցդ բռնեմ:  
Վե՛ր կաց,  
Դեպի ծո՛վ:

Անգլո-Պարսկական Նավթընկերության  
Փայտե՞ր ես դու,  
Խալիֆ Հյուսեյնի վորդի՞ն ես գուցե.  
Բաղդադի Շարիֆի վոսկու տե՞րն ես դու...  
Շարիֆի ուլտերի բարվանը  
Զգվում ե  
Բաղդադից Կասր Շիրին,  
Քիրմանշահիցը՝ Թեհրան,  
Բասրայիցը մինչ Բեյրութ...

Իսկ դո՛ւ  
Իսկ դո՞ւ...

Վե՛ր կաց,  
Յեղբա՛յր իմ,  
Ին՞չ ես տատանվում,  
Ափսոսանքի ի՞նչ ունես,  
Վոչի՞նչ,  
Ուրեմն  
Դեպի կյանքի ծովը ծփուն...

Հաշիշ չլինի թող հոգիդ,  
Վոռնացող հովազ լինի թող—  
Սուր-սուր ու հոշոտող ժանիքներով...  
Մի՛ որորիք հոգիդ աֆիոնով,  
Վորոտացող ամպրոպ լինի թող—  
Վառ ու հրկիզող շանթերով...

Քեզ խարազանել են կոպտաբար.  
Շղթաների վերքերը վոտներիդ վրա խորն են դեռ.  
Ձեռներդ կոշտ են ու բրոնզված.  
Մի՛ զույգ բազուկ ունես  
Յեվ ուրիշ վոչինչ,  
Վոչի՞նչ,  
Ուրեմն  
Իմ յեղբայրն ես դու,  
Յես—ընկերը բո...  
Վե՛ր,  
Թեվիցդ բռնեմ  
Դեպի կյանքի ծովը ծփուն. .

Աֆիոնով մի՛ թմրիր՝ թե տանջվում ես.  
Հաշիշով մի՛ բնիր, յեղբա՛յր իմ:

1922—Յերևան



## ՀԱՐԵՄԻՑ ԴՈՒՐՍ

Հարեմից դուրս փախչող  
Հարճի պես դեռահաս,  
Կարոտ՝ վառ կյանքի ու սերի,  
Արանքիցն ամպերի  
Լուսինը դուրս սողաց.  
Մազերը ցանցիր ուսերին:

Համարձակ քայլում ե  
Յերկնքիցը կապույտ  
Դեպի հեռուներն արեվի.  
Ու համպին աստղերը—  
Ջահե՛լներ շրջմուխի,  
Շարքով կանգնել են բարեվի:

Ո՛, վորքա՛ն ե տանջվել  
Ամպահյուս քողի տակ,  
Տանջվել հարեմի յեսիրում.  
Ատում ե փաղաքջանքն  
Ստրուկի, իշխողի,  
Միայն արեվին ե սիրում:

Սիրում ե նա միայն  
Արեվին աշխատող—  
Ինչպես մի բանվոր տիտանի.  
Սիրում ե նա միայն  
Արեվի սերը վառ,  
Սե՛րը աշխարհին պիտանի:

Քողազերժ ու հպարտ,  
Հարեմից դուրս փախած,  
Կարոտ՝ արեվի ու սերի,  
Յերկնքիցը կապույտ  
Լուսինը քայլում ե  
Մազերը ցանցիր ուսերին:

1920—Սևաստոպոլ



ԱԶՐԲԵՅՉԱՆ

1

Ջա՛ն,  
Ազրբեյջա՛ն,  
Եյ ջա՛ն,  
Իգի՛թ ես հիմի,  
Ջահե՛լ:  
Վառել ես  
Բյուրամոմ ջահեր,  
Վառել ես  
Շող,  
Շեմս-արեվ:  
Ջա՛ն,  
Ազրբեյջա՛ն,  
Եյ ջա՛ն,  
Սարահ խե՛յր,  
Սալա՛մ,  
Բարե՛վ:

Պարզել ես  
Բազուկդ կուռ

Դեպի  
Քերբելա,  
Մերթա:  
Բանտում ես  
Ալլահը ծեր,  
Քանդում ես  
Մինարա,  
Մզկիթ...  
Դրել ես  
Մի Հիսուս,  
Ալի —  
Պողպատե սալի վրա,  
Ծեծում ես  
Մուրճովդ ամուր  
Յեվ շինում  
Անիվ,  
Մոտոր...

Խփի՛ր  
Իրանի դռան  
Կռանդ հուժկու  
Յեվ կուռ,  
Քանդի՛ր  
Ամրոցները փակ.  
Քանդի՛ր  
Լուսամուտ  
Յեվ դուռ...

Թող ջահի-մահի յերկրում  
Տարածվի բերկրում,

Յնծում.

Թող վոխ

Ու զասում ծփա

Իշջի—Քահլայի սրտում...

Ջա՛ն,

Ազրբեյջա՛ն,

Եյ ջա՛ն,

Ջահակի՛ր,

Ջահե՛լ,

Ջիվա՛ն,

Կանգնել ես

Արեվի դիվան

Կրծքաբաց,

Այ կապած,

Պարթեվ:

Նոր Արեվելքին—Շարքին

Վառում ես

Այ վառ հրդեհ.

Հեզի ու մեզի հոգում

Փռում ես

Աստղեր հրթեվ...

2

Ջա՛ն,

Ազրբեյջա՛ն,

Եյ ջա՛ն,

Քո Ֆաթիմային սալա՛մ,

Վոր յերեսին

Ել բող չունի՛,

Վոր շարխաթից

Ել դող չունի՛:

Վոր յեթե ցանկա,

Ուզի—

Կհուզի սրտերն իգիթ:

Վոր հիմա

Չի՛ դնում

Հինա

Մազերին,

Ձեռքին,

Խելքին...

Քո Ֆաթիմային՝ սալա՛մ:

Քո Նաջիբային՝ սալա՛մ:

Քո Եմինեյին՝ սալա՛մ:

Սաբահ խե՛յր,

Սալա՛մ

Ու սե՛ր:

Իմ յերգը հարեմ չունի՛. —

Հարեմի դուռն ե քանդում,

Ուր հազար սրտեր կանաչ

Խամրում են անող քանտում...

Իմ արեվ կրթում,

Գրկում,

Իմ կարմիր գրքում,

Բաջի՛,

Յեռում ե սերը շեմսի

Յեվ կանչ

Ու պայքար քաջի...

Հե՛յ,  
 Բաքո՛ւ,  
 Բաքո՛ւ,  
 Բաքո՛ւ,  
 Բա քու հորերը նավթի՞:  
 Ի՛նչ,  
 Սըր Քոքս կուզի զավթի՞,  
 Բո՞քս խաղալ կուզի բեզ հետ...  
 Ապա թող գործի,  
 Փործի,  
 Վոր զգա ուժը բոքսիդ...

Հե՛յ,  
 Բաքո՛ւ,  
 Բաքո՛ւ,  
 Բաքո՛ւ,  
 Բա քու ֆանտանները զարկող,  
 Բա քու հորերը սարքող  
 Ռաբոչի—իշխի—բանվոր:—  
 Այն, վոր  
 խոր հորերդ ե փորում,  
 Այն, վոր  
 նոր որերդ ե բերում,  
 Բա ինչպե՞ս չասեմ նրան.  
 — Վա՛ր որ, ե՛յ, յողդա՛շ Հասան:  
 — Բարե՛վ բեզ, ընկե՛ր Սաքո:  
 — Ջղարովո, տավա՛րիշչ Իվան:

Ջա՛ն,  
 Ազրբեյջա՛ն,

Եյ ջա՛ն,  
 Իզիթ ես հիմի,  
 Ջահե՛ր,  
 Վառել ես  
 Բյուրամոմ ջահեր,  
 Վառել ես  
 Շող,  
 Շեմս-արեվ:  
 Ջա՛ն,  
 Ազրբեյջա՛ն,  
 Եյ ջա՛ն,  
 Սաբահ խե՛յր,  
 Սալա՛մ,  
 Բարե՛վ:

1923—ԹԻՓԼԻՍ

ՊՈՒՄ ՉԻՆԱԿԱՆ

L N S O U

**Տալի՛ Ծինկ,**  
Մանդարին կառ Դիի՛ աղջիկ,  
Լոտո՞ս ես դու:

Լոտոսը—  
Լուսաբացին ջրից բարձրանում,  
Լվացվում ե:

Կեսորին—  
Լոտոսն արեվի դեմ ժպտում,  
Բացվում ե:

Լոտոսը—  
Իրիկվան թագնվում ե ջրում,  
Գոցվում ե:

Լուսաբացին—  
Լոտոսի պես բացվեցիր դու:

Իրիկվան—  
Լոտոսի պես կգոցվես դու:

Իսկ ո՞ւր ե կեսորդ,  
Տալի՛ Ծինկ:

Կինամոնի  
Յեվ թեվուկի անուշաբույր յուղերով  
Ոծվում ես:

Չո՞ւր: <sup>է վառե</sup>  
Չե՞ վոր <sup>վառե՞լ ես:</sup>

Լոտոսի պես իրիկվան գոց<sup>վում</sup> ես:  
Անուշաբույր յուղերը  
Քեզ արեվ տվող չե՛ն:

Նուրբ նազանքներդ  
Յերկար տեվող չե՛ն:

Չե՞ վոր  
Կեսոր չունես դու,

Տալի՛ Ծինկ,  
Չին մանդարին կառ Դիի՛ աղջիկ:

Կեսորվա արեվը վառ կրակ ե,—  
Գրանիտ հոգիները հուզում ե:  
Բանվոր մարդն ուզում ե  
Գրկի արեվձին կրքի աղջկան:

Իսկ դո՛ւ  
Վախե՛լ ես,  
Արեվիցը  
Փախե՛լ ես,  
Ե՛, Ե՛, Ե՛,  
Չինմաչինի չինի չե՛ն աղջիկ:

Հայրդ  
Հարուստ մանդարինն ե Պեկինի:

Ունի թե գինի,

Թե շարքաթ

Ու խորտիկ:

Ջնգուն ստերլինգները — շա՛տ:

Ջնգուն վոսկիները դիգել ե

Հազար հեւ Մ Կրի զրկանքիցը:

Նրան՝ զել ե:

Ի:

Քյուրեղյա քյուշկումն ե պահում,

Տայի՛ Ծինկ,

Մանդարինի արեվազո՛ւրկ աղջիկ:

Քյուշկումը

Որորվում ես որորով:

Մեղկ փուված որերով

Յերազում ես,

Նուրբ ու մեղմ

Նազում ես:

Պերսին ծաղկի հոտն ես քաշում

Յեվ հնազում,

Հազում ես:

Ու մաշում ես որորուն որերըդ:

Տայի՛ Ծինկ,

Մանդարին Կառ Դիի՛ աղջիկ:

Վոսկիներն արեվի տապը չունեն:

Վոսկիները մաշում են մարդուն:

Իսկ արեվի շողերը մարդուն թրծում,

Խաշում են:

Մաշո՛ւմ են,

Մաշո՛ւմ են,

Մաշո՛ւմ են

Բյուրեղյա քյուշկերը մարդուն...

Ե՛, Ե՛, Ե՛,

Ձինմաչինի չինի չի՛ն աղջիկ,

Արեվի դեմը մարմինդ վառե՞լ ես:

Բրնձի ձիգ արտերը վարե՞լ ես:

Պայքարումը խոր վերքեր առե՞լ ես:

Հառե՞լ ես հայացքդ հեռվին հուր...

Չե՛,

Չե՛,

Չո՛ւր ..

Ե՛,

Ձինմաչինի չինի չի՛ն աղջիկ,

Դու մի լոտոս եյի՛ր լուսաբացին:

Իրիկվան—

Լոտոսի պես կգոցվես լուռ:

Իսկ կեսորըդ

Ձի՛ լինի,

Ձի՛ լինի,

Ձի՛ լինի,

Չե՛

Ե՛,

Ձինմաչինի չինի չի՛ն աղջիկ:

Գիշեր:

Պեկինը գիշերում

Ոպիռումի որորանք ե,

Պեկինը գիշերում

Իեղին ուլունքով որորան ե:

Պեկինը գիշերում

Որորում ե բեֆ քաշող քյոշկերը:

Որորում ե հոգնած կուլիի բունը:

Գիշեր:

Խավարը խառնել ե Պեկինի բարտեզը:

Պարտեզը Տայի Ծինկի

Խաղաղ ե,

Անծայն:

Յերկու սովերներ անցան,

Ծաղկած ծառի տակ կանգ առին:

Մեկը

Ցաա Ցին ե--

Տայի Ծինկի վարձու մակույկավարը:

Մյուսը

Ծիու կան ե--

Տայի Ծինկի պարտիզայանի աղջիկը:

Յեվ խոսում են նրանք բարձր:

-- Ծիու կա,

Զինմաչինի չին չարքա՛շ աղջիկ,

Ծովի հորձանքների նման  
Հուզվե՛լ ես դու...

— Ցաա՛ Ցի,

Զինմաչինի չին չուգո՛ւն մանչ,

Հորձանուտ ծովերի խորքումը

Սուզվե՛լ ես դու...

Մանչն ասաց.

— Ծիու կա,

Հրակ ես,

Ճահանչող երա՛գ ես,

Արեվի տա՛ւյ դու:

Աղջիկն ասաց.

— Ցաա՛ Ցի,

Քաղցր ես,

Խրոխտ ու բա՛րձր ես,

Կա՛րձր ես

Զուգունի չափ դու:

Լուսամուտիցը քյոշկի

Տայի Ծինկը լսում ե լարված.

Ասես,

Պինդ հարված տվին

Նրա սրտին վառված:

Խա՞նդն եր իր սիրտը խայթողը,  
ե՛:

Տայի Ծինկ,

Հարուստ մանդարինի՛ աղջիկ,

Պարտիզումը  
Արեւավառ յերկու սրտեր կան,  
Մեկը  
Ցզա Յին ե—  
Վարձու մակույկավարդ.  
Մյուսը  
Ծիու կան ե—  
Պարտիզականիդ աղջիկը:  
Տայի՛ Ծինկ,  
Պարտիզումը  
Արեւավառ յերկու սրտեր կան.  
Իսկ վորքա՛ն ցրտեր կան  
Քո սրտումը...

Նրանք  
Եսոր  
Կեսորվա արեւներ են արեւի դեմ.  
Կեսորվա արեւ են  
Զարթնող աշխարհի համար:

Յեւ նրանք  
Հազար են  
Ու ելի՛, ելի՛—  
Վոր կառուցել են բյուրեղերը ձեր...  
Ու թե վրեժը նրանց կանչի  
— Յելի՛ր,—  
Կքանդեն ձեր աշխարհը ծեր...

Իսկ դու կեսոր չունե՛ս, չունե՛ս,  
Յերեկ ու եսոր չունե՛ս, չունե՛ս:

Իրիկունդ շուտով կգա՛, կգա՛,  
Մանդարին կառ Դիի հյուծված աղջիկ:

Յ Ի Ա Վ Ա Ր Ը

Հուսաբաց:  
Պեկինը  
Արեւի բաղնիքումն ե:  
Քյոշկերը  
Վառվում են վոսկեշողով:  
Զիգ ու ծուռ փողոցներումը  
Աղմկում են կուլիները:

Տայի Ծինկը մակույկումն ե:  
Մակույկը— լնի վրա:  
Վարձու մակույկավար Ցզա Յին  
Թիավարում ե:  
Վարձու յե տվել իր բազուկը գույգ,  
Վոր որվա մեջ  
Կես անգամ խաշած բրինձ ծամի:

Ե,  
Ցզա՛ Յի,  
Հանդու՛ղն թիավար,  
Ծփուն ծովերումն: Ել կլողաս դու:  
Բազուկներդ կուռ են ու թափով:

Թե հորձանուտ ծովերում  
Թիավարես դու,  
Տայի Ծինկը  
Մակույկումը նստողը չի,—

Նա հարուստ մանդարինի  
Փխրուն աղջիկն է.  
Հորձանքիցը սոսկում է նա:  
Մարում է նա փորձանքիցը...

Կրժքիդ տակը տայֆունն է դըրդում,  
Ցասկոս ծովերի կարոտն է հուզում քեզ.

Ե՛,  
Ցզա՛ Ցի,  
Հանդու՛զն թիավար,  
Լճակը մի փոքր բաժակ է,  
Ահա՛ նրա հատակը:  
Կատա՛կ են մակույկն ու լիճը:  
Ափից ափը մի թռիչք է.  
Կատա՛կ է:

Իսկ կրժքիդ տակը  
Տայֆունն է դըրդում,—  
Արեվելքի ցասումը,  
Զինմաչինի  
Չարքաշ չիների  
Ազատության շառաչը...

Ե՛,  
Ցզա՛ Ցի,  
Հիշո՞ւմ ես,  
Նավաստի եյիր նավում շոգեվար:

Թռիչքդ ովկիանից ովկիանն էր,  
Թեվերդ՝ աշխարհից աշխարհ.

Որերիդ գարունը նրանցն էր,  
Վորոնք քամում եյին  
Զինմաչինի արյունը հորդ...

Ե՛,  
Ցզա՛ Ցի,  
Հիշո՞ւմ ես,  
Մի որ ել ծովափ նետեցին քեզ:  
Հեզ ու համր մարդ էր պետք նրանց,  
Իսկ կրժքիդ տակը  
Տայֆունն էր դըրդում. .  
Ցեվ հիմի՛  
Վարձու յես տվել բազուկներդ զույգ,  
Վոր որվա մեջ  
Կես անգամ խաշած բրինձ ծամես ..

Ահա Տայի Ծինկը մակույկումը նստած՝  
Նայում է աչքովն իր բութ:  
Վարձու Ցզա Ցին  
Թիավարում է:  
Իսկ Տայի Ծինկը կրքից հեվում  
Ու մարում է:  
Հուզում է նրան վարձու ստրուկը...  
Աղջիկն ուզում է  
Չուլվի նրան,  
Սիրի,  
Տիրի...

Բսանհինգ տարու  
Արու յե իր ստրուկը,

Իսկ ինքը—  
Հասուն եգ,  
Սեգ  
Ու սիրուն տիրուհին նրա...

Վեր թռավ չար—  
Զինմաչինի չինի չին ճկուն աղջիկը.

— Ե°,  
Ցզա՛ Ցի,  
Իմ վարձու ստրո՛ւկ դու,  
Այժմ ինձ վարձիր դու,  
Իմ տերը դարձիր դու:  
Գրկի՛ր ինձ,  
Պրկիր ինձ գրկումդ,  
Կրքումդ հալվեմ թող,  
Ե°:

Ցզա՛ Ցի,  
Կտամ ինչ վոր ուզես,—  
Բյուրեղյա բյուրեղս՝ քե՛զ.  
Մարջաններս ու փերուզներս՝ քե՛զ.  
Ցես ել լինեմ քեզ,  
Լինեմ հեզ  
Հարճի պես,  
Ե°:

— Տիրուհի՛,  
Թեվերս թո՛ղ,

Թո՛ղ,  
Վոր թիավարեմ յես:

— Ե°,  
Ցզա՛ Ցի,  
Արեվի արո՛ւ մանչ,  
Ի՛նչ,  
Զինմաչինի  
Զինի չին չքնաղ աղջիկը չե՛մ:  
Ե°:

Գրկի՛ր ինձ,  
Գրկիր ինձ,  
Ասա ինձ կեսն այն խոսքերի,  
Վոր ասում եյիր  
Պարտիզպանիս աղջկանը բոբիկ:

— Տիրուհի՛,  
Թեվերս թո՛ղ,  
Թո՛ղ,  
Վոր թիավարեմ յես:

— Ե°,  
Ցզա՛ Ցի,  
Ճրտիցը դողում եմ յես,  
Սողում եմ ծնկերիդ մոտն ահա:  
Գրկիր ինձ բարկ գրկումդ.  
Սրտումդ սեր չկա՞ վոր,  
Ե°:

— Տիրուհի,  
Թեվերս Թո՛ղ,  
Թո՛ղ,  
Վոր թիավարեմ յես:

Պեկինոււք  
Ջահել մանդարիններ չկա՞ն վոր—  
Ազնվացեղ,  
Հարուստ,  
Կրքոտ:  
Նրանց բամե՞լ ես վոնց վոր կիտրոն,  
Նրանց սերը սա՞ռն ե հիմի...

Իսկ յես  
Վարձու յեմ տվել քեզ բազուկներս միայն,  
Վոր որվա մեջ  
Կես անգամ խաշած բրինձ ծամեմ:

Տիրուհի,  
Թեվերս Թո՛ղ,  
Թո՛ղ,  
Վոր թիավարեմ յես:

— Ցզա՛ Ցի,  
Թիերդ կրծքիս վրա վարիւր,  
Մեջքիս շուրջը լարիւր բազուկներդ,  
Լճակդ լինեմ յես,  
Ե՞:

— Տիրուհի,  
Թեվերս Թո՛ղ,

Թո՛ղ,  
Վոր թիավարեմ յես:

Յես  
Որվա մեջ կես ժամ եմ սիրում նրան:  
Նա  
Որվա մեջ կես ժամ ե սիրում ինձ...  
Լուսաբացից մինչ արեվմուտը  
Մեր բազուկները վարձու յեն...

Լուսաբացից մինչ արեվմուտը  
Մեր սրտերն աշխարհի գալիքներին են.  
Մարդկային փոթորկվող ալիքներին են.  
Հողմերին  
Ու աշխարհի չորս կողմերին են.  
Մեր սրտերը  
Ազատատենչ բյուր սրտերին են...

Տիրուհի,  
Թեվերս Թո՛ղ,  
Թո՛ղ,  
Վոր թիավարեմ յես:

Դու քնքուշ,  
Ուժատ  
Ու շատ նուրբ ես:  
Իսկ իմ հույզերը քանդող են:  
Անթո՛վ են քեզ իմ խուռն խոսքերը  
Ու ձեռներըս — կոպիտ:  
Մարջաններդ — բե՛զ:  
Փերուզներդ — բե՛զ:

Նրանք հատիկ-հատիկ արցունքից են,  
Կաթիլ-կաթիլ արյուն են նրանք...

Իմ սերը մարջանին չի,  
Իմ սերը վոսկուն չի,  
Բյուրեղյա բյուրեղին չի,  
Ցեա ծովի ու սովի սովոր մարդ եմ,  
Ինչի՞ս պետք մեռնող ու մաշված սերդ:  
Ե՞:

Տիրուհի,  
Թեվերս թո՛ղ,  
Թո՛ղ,  
Վոր թիավարեմ յես:

L N S O U

Ոպիումը գերում է մարմինդ:  
Ոպիումը բերում է թմբիր:  
Ոպիումը  
Որորո՞ւմ է,  
Որորո՞ւմ է,  
Որորո՞ւմ:  
Ծխի՛ր,  
Ծխի՛ր,  
Ծխի՛ր...

Ոպիումը թաղում է կրքերդ—  
Ծխի՛ր,  
Ծխի՛ր ..

Տայի Ծինկը ծխում է:  
Ծխում է ու հազում է:  
Ծխում ու յերազում է...  
Մահճի փափուկ բարձերը գրկած—  
Կրքից դողում է,  
Սողում է պորտի վրա:  
Ցերազում է:  
Քունը չի՛ գա,  
Քունը չի՛ գա.  
Չե՛,  
Քրտնքումը լողում  
Ու դողում է...  
Քունը չի՛ գա,  
Չե՛:  
Ե՞:

Քսանհինգ տարու  
Արու յե իր ստրուկը .  
Ե՞:

Ոպիումը բուն է բերում,  
Ծխի՛ր,  
Ծխի՛ր,  
Ծխի՛ր:

Գիշերվա մթնումը .  
Մի եզ շուն  
Նրա սրտումը վռնում է տրտում...

Գիշերվա մթնումը—  
Մի եզ շուն

Փողոցումը վռնում եւ տրտում,  
Մի հեգ շուն  
Դռան մոտը—ցրտում...

Ե՛,  
Տայի՛ Ծինկ,  
Հոգումդ ծմեռ ու ծյուն կա հիմի:  
Մահման հծծյուն կա հիմի:

Շան նման մեկը ներսդ վռնում ե  
— Ա ո՛ւ ո՛ւ ո՛ւ:  
Ե՞:

Լսեցի՞ր:

Հիմի կյանքը թվում ե քեզ  
Չար ու չնչին.  
Զինմացինի չինի չի՛ն աղջիկ,  
Չե՞,

Հարուստ մանդարինների սերը  
Թվում ե չնչին...

Սպասես ել ինչի՛ն.

Տայի Ծի՛նկ,

Բյուրեղյա քյոշկի թմրո՛ղ աղջիկ:

Տայի՛ Ծինկ,

Մանդարին Կառ Դիի՛ աղջիկ,

Մաղձոտ ու թախձոտ ես հիմի:

Ոպի՛տե՛մ ծխիր:

Քո՛ւն մտիր:

Թմրի՛ր դու:

Լուսաբացին—

Լոտոսի պես բացվեցիր դու:

Լոտոսի պես գոցվում ես—  
Իրիկունդ ե:

Իսկ արեվշող կեսորդ

Չեկա՛վ,

Չեկա՛վ:

Տայի՛ Ծինկ,

Մանդարին Կառ Դիի՛

Անարեվ ու պռունի՛կ աղջիկ...

1924—ԹԻՓԻԵՍ

1

Հույզերիս հազարը քե՛զ տամ,  
 Յերգերիս հզորը քե՛զ տամ,  
 Գորշ կյանքիս երեկը բո՛նն եր,  
 Վառ կյանքիս եսորը քե՛զ տամ.  
 Յերկիր իմ, իմ հարազատ դու,  
 Չինմաչի՛ն, հուր Արեվե՛լք դու,  
 Գիշերվա խավարը բո՛նն եր,  
 Արեվշեկ կեսորը քե՛զ տամ...

Իմ յերգը հույզերիդ մե՛ջն ե,  
 Շրջում ե խուռն շարքերո՛ւմըդ,  
 Իմ յերգը պայթարիդ մե՛ջն ե,  
 Հնչում ե կուռ զարկերումըդ.  
 Յերկիր իմ, իմ գովակա՛ն դու,  
 Հրձիգ դու, արեվածի՛ն դու,  
 Վորքա՛ն դեռ հրդեհնե՛ր կան  
 Հոգումըդ, խոր ծալքերո՛ւմըդ...  
 Վորքա՛ն դեռ զրնգուն յերգեր կան,  
 Վոր բարձր ու զիլ յերգես դու.

Վորքա՛ն դեռ ցավ ու վերքեր կան,  
 Վոր վաղը հպարտ հերքես դու.  
 Յերկիր իմ, արնահեղե՛ղ դու,  
 Տիտա՛ն դու, վորոտահո՛ւնչ դու,  
 Վորքա՛ն դեռ ծիգ փողոցնե՛ր կան,  
 Վոր ալ ու արնով ներկե՛ս դու...

Գալարվում եր երեկ սի՛րտըս՝  
 Ծանր ու խոր բո հառաչի՛ցը,  
 Իսկ այսոր, հե՛յ, յես հարբե՛լ եմ՝  
 Հաղթ ու զոռ բո շառաչի՛ցը...  
 Յերկիր իմ, զարթնած կուլի՛ դու,  
 Վրիժավառ, թնդացող ոտ՛ւմք դու,  
 Յես բայլում եմ միլիոնի՛ հետ  
 Շարքերիդ մի՛շտ առաջի՛ցը...

2

Շանհայի փողոց:

Ամառ:

Կեսոր:

Գործադուլ:

Ցույց ե:

Ցնցում:

Հնձում ե

Գնդացիրն եսոր

Բանվորին,

Գյուղացուն

Ըմբոստ...

Զարթնել ե կուլին շարքաշ—  
Քնիցը գերող ու խոր:

Զինմաչինը

Հուր ե

Հիմի,

Որերը — պայքար, ժխոր...

Զինը չնչին չի՝ հիմի.

Փշրվող ու նուրբ չինի չի՝

Զինը

Հինը չի՝ հիմի.

Քնաբեր ու մեղկ գինի չի...

Շանհայի փողոցումն եսոր

Հորդում ե կյանքը բոցված:

Մռնչում ե առյուծը հզոր,

Սիրտը խոր ու խոր խոցված ..

Շարժվում են շարքերը փողոցով:

Ծով ե փողոցը յերթով:

Փռվել են դրոշներն ալ-հուր:

Փողոցը թնդում ե յերգով:

— Յելի՛ք,

Ում կյանքը տանջանքով լի յե,

Ով վոր բանվոր-կուլի յե,

Մեքենավար,

Նավաստի,

Իարբին,

Հնձող,

Առա՛ջ,

Առա՛ջ,

Առա՛ջ...

Բանկերը Լոնդոնի, Տոկիոյի—

եսոր գնդակով են խոսում:

Շանհայի փողոցումն եսոր

Զիների արյունն ե հոսում...

Կանգնած հնդիկ զինվորներ հիսունմեկ՝

Դեմ առ դեմ շարքերի անանց,

Գնդակի յեն բռնում անխնա

Ծերերին,

Փոքրերին,

Կանանց...

Մի ջահել սպա սպիտակ,

Յեկած Լոնդոնից հեռավոր,

Հրաման ե տալիս կտրուկ.

— Կրա՛կ, անդադար կրա՛կ:

Մեկը հիսունմեկ զինվորից —

Ռամ Ռոյը՝ հնդիկ զինվոր,

Հրացանը ձեռքին բռնած

Կանգնել ե մտածկոտ ու լուռ:

Յեկ հենց այդ դաժան ժամին

Թռչում ե Շանհայից հեռո՛ւ

Խոհուն միտքը Ռամ Ռոյի,

Ռամ Ռոյի հոգին յեռուն:—

Հեյ հե՛յ,  
Հեռավոր Հինդում,  
Բիխուրի գավառում փոքրիկ,  
Հայրենի գյուղն ե լերեվում,—  
Գյո՛ւղը աշխատող ու սոված,  
Յեվ ահա գյո՛ւղի վերեվում,  
Գանգեսի ափին կպած  
Յեղեգնյա խրճիթը Ռամ Ռոյի,—  
Տկտր Փաքիրի նման  
Իր բախտին կամ մահման սպասող...

Ռամ Ռոյը տեսնում ե կարծես,  
Կարծես տեսնում ե,—

Ահա՛  
Չոր խարի վրա պառկած  
Իր կինը հյուժված յեվ հիվանդ:  
Յերկու մանչուկներ մատղաշ  
Նստել են հեվքոտ մոր կողքին,  
Յեվ ինչպե՞ս,  
Ինչպե՞ս ուզեն  
Մայրիկից մի պատառ չոր հաց...

Ամեն առավոտ-իրիկուն,  
Կարոտով,  
Կակիծով մանկական՝  
Հիշում են իրենց հորը —  
Ռամ Ռոյին,  
Հիշում են կարոտով  
Ու լալիս:  
Ու հարց են տալիս անվերջ

Մահամերձ յեվ անճար մայրիկին.

— Մա՛յր,  
Ո՞ւր ե,  
Ո՞ւր ե հայրը մեր.  
Ինչե՞,  
Ել ինչի՞ չի գալիս...

Ե՛խ,  
Ռամ Ռոյը ինչպե՞ս չիշի,—  
Թե բանի միտեր ու սիր  
Հինդը շինել են մի խսիր  
Ու նստած քեֆ են քաշում...  
Յեսիր ե Հինդը հիմի,  
Շղթայված,  
Իր կյանքն ե մաշում...

Ա՛խ,  
Ռամ Ռոյը միթե չգիտի՞,  
Վոր բանի՞ միա ու ռաջա  
Խեղդում են դաժան թափով,  
Խեղդում են խալխին անճար...  
Միտերը,  
Միան  
Ու ռաջան  
Քամում են քրտինքը խեղճի,  
Տանում են,  
Գողանում անձայն  
Խեղճի շապիկը վերջին...

Ե՛խ,

Ռամ Ռոյը ինչպե՞ս չհիշի,—  
Թե քանի՞, քանի՞ անգամ  
Դրել են զնդացիք մահաբեր  
Չարբաշ հին Հինդի սրտին...  
Յե՛վ քանի՞ բանվոր-գյուղացի  
Ընկել են զնդակեցը խոցող...  
Ու դեռ քանի՞ սը կընկնեն  
Սրտերը վրեժի բոցով...

Ռա՛մ Ռոյ,

Հե՛յ,

Հնդի՛կ զինվոր,  
Տերդ անաշխատ,  
Դաժան՝

Յերկրումդ քեզ գերեց,

Քեզ Շահհայ բերեց,

Ինչի՞,—

Վոր յերբ Չինի կանչը հնչի,

Յերբ թնդա սիրտը Չինի,

Չինի՛ քեզ,

Դահիճ շինի,

Ու հրաման տա.

— Առա՛ջ,

Կրա՛կ...

Ռա՛մ Ռոյ,

Հե՛յ,

Հնդի՛կ զինվոր,

Կրակե՞ս դու պիտի,

Կրակես չարբաշ չինների վրա՞...

Թուչում են զնդակները կարկուտ  
Դեպի շարքերը չիների...  
Չինմաչինը յերբեք չի՛ ների  
Սպանդն այդ դաժան յե՛վ անգուլթ...

Չինմաչինը յերբեք չի՛ ների  
Դահեհին դավադիր ու դաժան,  
Վոր ըմբոստ, չարբաշ չիների  
Արյունը թափեց փողոցում...

Գնդակները նորից են թուչում  
Ուղիղ:

Անվրեպ:

Համազարկ:

Չինների շարքերը՝ անգեն,

Բայց լքում չկա.

Չի՛ լինի:

Թող տեղա կրակ մահատու,  
Թող հնձի հազարը ետոր,  
Բայց կզան նորերը հատու,  
Վրեժով վառված ու հզոր...

Գնդակները թնդում են անկանգ,  
Գնդացիքը հուր ե ցանում...  
Հնդիկ զինվորները անկամբ  
Շարքերիցը հունձք են անում...

Ահա ուսանող մի ջահել—  
Փռվել ե փողոսմը, գետին.  
Յեվ բերում ե հողն արնաներկ,  
Հեվում ե շնչովն իր հետին:

Ընկավ մի կուլի վերք առած,  
Գլխիցը արյուն ե հոսում.  
Հայացքը հեռուները հառած,  
Ինչ-վոր զառանցում ե, խոսում:

Մի տաս տարեկան չին տղա,  
Կիսամերկ, բորիկ, նուշ աչքով,  
Սեղմած բռունցքները փոքրիկ,  
Կանգնել ե բանվոր հոր կողքին:  
Յեվ հանկարծ գնդակ մի բոցված—  
Ծակեց խոր կուրծքը չին տղի.  
Ընկավ նա կրծքիցը խոցված,  
Ճչալով նվաղ.  
— Ա՛ա՛ա՛խ, հայրի՛ի՛ի՛կ...

Գալարվեց սիրտը Ռամ Ռոյի:  
Յեվ թվաց նրան, վոր իրավ,  
Իր մանկիկն եր նա հարազատ—  
Ընկավ վիրավոր ու մեռավ...

Գալարվեց սիրտը Ռամ Ռոյի:  
Հիշեց հայրենիքն իր Հինդ—  
Պինդ շղթաներով շղթայված...

Հիշեց մանկիկներն իր անտեր,  
Վոր գուցե մեռել են բաղջից...

Յեվ կամ հենց գուցե այդ ժամին—  
Նրանք ել ընկան արնաբամ...

Գալարվեց սիրտը Ռամ Ռոյի:  
Աչքիցը կայծեր են հորդում:  
Կարծես, այն փոքրիկ չին տղան  
Այնպե՛ս նման եր իր վորդուն...

Կարծես այն փոքրիկ չին տղան  
Այնպե՛ս նման եր իր վորդուն...  
Իր վորդու սրտիցն ե, կարծես,  
Ալ կարմիր արյունը հորդում...

Յեվ ահա սրտումը Ռամ Ռոյի  
Ճչում ե սուր ձայն մի ծանոթ,  
Կարծես իր մանկան ճիչն ե այն.  
— Ա՛ա՛խ, հայրի՛ի՛ի՛կ,  
Ամո՛թ բեզ, ամո՛ո՛թ...

Ռամ Ռոյը ցավիցը ցնցվեց:  
Ինչ-վոր բիրտ ձեռք առնական  
Պոկում ե իր սիրտը տեղից..

Ռամ Ռոյը ցավիցը ցնցվեց:  
Յեվ հանկարծ թափով վեռական  
Կանգնեց ուղղածիգ, լուռ յեվ սեգ—  
Շարքերի առաջ հնդկական.  
Ու կանչեց խրոխտ, բարձրականչ.  
— Հե՛յ,  
Հնդի՛կ զինվորներ,  
Ի՛նձ լսեք,

Լսե՛ք,  
Յեղբայրնե՛ր իմ անգիտ,  
Կա՛նգ առեք,  
Ել մի՛ կրակեք ձեր յեղբայրների վրա,  
Ձեր վորդիների,  
Քույրերի

Ու ձեր հայրերի վրա...  
Սհա կանգնել եմ յես անվախ,  
Կրծքաբաց կանգնել եմ ձեր առաջ...

Ու յես կմեռնեմ անհատաչ—  
Թե վոր գնդակները ձեր թեժ  
Խրվեն կրծքումս կարծրակուռ...  
Ձե՛,

Կրակողը չե՛մ յես յերբեք  
Չարքաշ չինների վրա...  
Վրեժիցը մեր մահաբեր  
Իողա թող սպան մեր դաժան...

Թող մեր գնդակներն անվրեպ  
Սուլին յեվ թռչեն յեվ խոցեն  
Կրծքերը մեր բիրտ տերերի...  
Ձե՛,

Կրակողը չեմ յես յերբեք  
Չարքաշ չինների վրա...

Շփոթ ե տիրել շարքերին:  
Հիսուն զինվորները հնդիկ—  
Կանգնել են անշարժ ու մռայլ:

Հնչեց հրամանը սպայի.  
— Գնդակել նրան,  
Կրա՛կ:

Հիսուն զինվորները հնդիկ—  
Կանգնել են անշարժ ու մռայլ:

Հրամանը նորի՛ց ու նորի՛ց.  
— Լսո՞ւմ եք, պատ-րա՛ստ, կրա՛կ:

Հիսուն զինվորները հնդիկ—  
Կանգնել են անշարժ ու մռայլ:

Դողում ե խուլ ծայնն սպայի.  
— Հե՛յ,

Դո՛ւք,  
Ձինվորնե՛ր հնդկացի,

Հիշեցեք,  
Հինդում հեռավոր  
Ձեռքումս պատանդ եք թողել  
Ձեր հայրերը ձեր ու վորդիք...

Լսո՞ւմ եք,  
Կրկնում եմ,  
Կրա՛կ:

Պարզվեցին հրացանները հիսուն  
Դեպի կուռ կուրծքը Ռամ Ռոյի:  
Հրամանը համառ վորոտաց:  
Յեվ հրացաններիցը հիսուն

Սուլեց զիլ  
Միայն  
Հինգ  
Գնդակ...

Որորվեց Ռամ Ռոյը գունատ:  
Մահամերձ փուվեց չոր գետնին:  
Դեմքին դողում ե դառն ժպիտ:

Իջան հրացանները հիսուն:  
Հիսուն զինվորները հնդիկ—  
Կանգնել են անշարժ ու մռայլ:

Յեվ ընկավ Ռամ Ռոյը գունատ:  
Մահամերձ փովել ե գետին:  
Դեմքին դեռ դողում ե ժպիտ:

Ձեռքը պինդ սեղմած խոր վերքին,  
Սողում ե առաջ ու առաջ  
Դեպի շարքերը չիների:  
Սողում ե,  
Հեվում  
Ու նորի՛ց:  
Դողում ե,  
Հեվում  
Ու նորի՛ց...

Շարքերի մոտը չիների  
Փողոցի փոշումը պառկած  
Խամրել ե փոքրիկ չին տղան,  
Վոնց վոր մի ծաղիկ տրորված,  
Յեվ վիշտը սառել ե դեմքին:

Ռամ Ռոյը ժպտով դառնազին  
Սողում ե առաջ ու առաջ  
Դեպի չին տղան մահացած:  
Սողում ե,  
Հեվում  
Ու նորի՛ց:

Դողում ե,  
Հեվում  
Ու նորի՛ց.

Լուռ ե: Հրացանները՝ անձայն:  
Հիսուն զինվորները հնդիկ—  
Կանգնել են տխուր ու մռայլ...

Յեվ ահա Ռամ Ռոյը հնդիկ—  
Դրկեց կարոտով չին տղին,  
Ինչպես իր վորդուն հարազատ.  
Կարծես շնջում ե կամաց.  
—Յես յեվ դու ընկանք այս կովում,  
Վոր Ձինը լինի մի՛շտ ազատ.

Ավելի հզոր ե հիմի  
Թափը թնդացող շարքերի...  
Բյուր սրտեր ձուլված են հիմի...  
Լսո՞ւմ եք ձայնը գարկերի...

Ավելի խրոխտ ե հնչում  
Հիմի կանչը գոռ չիների.  
— Ո՛ր, Ձինը յերբեք չի՛ ների  
Դահեհին դավադիր ու դաժան,  
Վոր քանի՛ չարքաշ չիների  
Արյունը թափեց փողոցում...

Ավելի խրոխտ ե հնչում  
Հիմի ռազմերգը չիների.  
— Յելե՛ք,  
Ում կյանքը տանջանքով լի յե,

Ով վոր բանվոր-կուլի յե,  
Մերենավար,  
Նավաստի,  
Դարբին,  
Հնձող,  
Առա՛ջ,  
Առա՛ջ,  
Առա՛ջ...

Ինչպես հայր-վորդի հարազատ -  
Ռամ Ռոյը՝ զինվորը հնդիկ,  
Ու տաս տարեկան չին տղան—  
Գրկել են իրար անբաժան ..

1925—Մոսկվա



## ՍԱԼՍՄ ԱԼԵՔ ԲՈՒՄ

1

Հե՛յ,

Արեվելքի մոնչացող ալամ,  
Սալամ բեզ:

Այն ո՞վ ե,  
Վոր ինձ ձայնում ե.  
— Յերգի՛ր...

Այն ո՞վ ե,  
Վոր հազարականչ ձայնով ե.—  
Յզան Յին,  
Հակոն,  
Հասան,  
Նոր մարդը—մասսան.  
Բանվոր մասսան—ալամը:  
Նոր մարդուն—ալամին—  
Սալամ:

Հե՛յ,

Արեվելքի զարթնո՛ղ ալամ,

Հուզեցիր ինձ:  
Ուզեցիր, վոր յերգեմ քեզ:  
Ուզեցիր վոր հինը հերքեմ յես...

Հե՛յ,  
Արեվելքի մոնչացո՛ղ ալամ,  
Պայքարիդ ծփանըր տեսել եմ,  
Յե՛ս ել եմ,  
Յե՛ս ել,  
Յե՛ս ել եմ ծփում...

Արեվե՛լք,  
Քեզ ցանցում են  
Ձույզ յերկաթգծերը.  
Ուղտապան ծերը  
Կմեռնի՛,  
Մեռնի՛ թող...

Լոնդոնի վոսկենորթը չգիտի՞,  
Վոր վորքան ցանցում են քեզ.  
Այնքան ցնցում ե քեզ,  
Վոր վաղը ցնծաս դու...

Քո շոգեկանչին վաղվա,  
Քո գորակոչին վաղվա,  
Քո լուսարագին՝  
Նվեր իմ դալամը:

Հե՛յ,  
Արեվելքի մոնչացո՛ղ ալամ,  
Սալամ քեզ:

Սալամ ալե՛ք բում, Արեվե՛լք,  
Քո նոր շայիրեց բարե՛վ քեզ,  
Նորի՛ց ու նորի՛ց ու նորի՛ց  
Հրաշո՛ւնչ յերգ ու արե՛վ քեզ:

Ձե՞ վոր վորդիդ եմ— քո ցեղե՛ն,  
Բոցեղեն մա՛յր իմ Արեվելք—  
Յերեկ— դու գերի կուռքերի,  
Այսոր— շառաչող Արեվե՛լք...

Վորպես ուազմականչ ու գասում —  
Ասում եմ յերգեր գարթո՛նքիդ.  
Ու թող աշխարհի հինգ մասում  
Գովքըդ դողանջի, Արեվե՛լք...

Սալամ վաղվա վառ որերիդ.  
Սալամ պայքարիդ հրեղեն.  
Սալամ մարտնչող նորերիդ.  
Սալամ քեզ նորի՛ց ու նորի՛ց:

Սալամ ալե՛ք բում, Արեվե՛լք:

1921—Մուսուլ



ԱՌԱՋԻՆ ՄԱՍ

	62
Յերգ իմ . . . . .	5
• Ամենուր . . . . .	7
Դիկտատոր . . . . .	9
Քսանվեց կոմսոնարներին . . . . .	14
✕ Փոքրիկ լրագրավաճառ . . . . .	17
Զանգհար . . . . .	19
Յերևան . . . . .	22
Աշնան տերևի նման . . . . .	25
✕ Ժամացույցը . . . . .	28
Մանչուկ . . . . .	31
Շոգեկառք . . . . .	35
Մալխական . . . . .	38
Հ.Ս.Ս.Հ. . . . .	45
✕ Արտելը . . . . .	47
✕ Զան, Սափետի յերկիր . . . . .	49
✕ Լենին . . . . .	52
Մենք . . . . .	58


ՅԵՐԿՐՈՐԴ ՄԱՍ

Զան, Արևելք . . . . .	61
✕ իմ յերգը . . . . .	63

	Եջ
Լսիր, իմ ընկեր . . . . .	68
Ուղտ . . . . .	75
Յերկու սեր . . . . .	80
Սթամբուլ . . . . .	86
Կալկաթա . . . . .	88
Բոմպեյ . . . . .	91
Իրաննամե . . . . .	97
Էսստանափորդներ . . . . .	101
Արևելքի փողոցում . . . . .	105
✕ Դերվիշը . . . . .	110
✕ Դրախտ . . . . .	116
✕ Ծովը . . . . .	122
Հարեմից դուրս . . . . .	126
✕ Ազրբեյջան . . . . .	128
Պոսեմ չինական . . . . .	134
Ռամ Ռոյ . . . . .	152
✕ Մալամ ալիք քում . . . . .	167



« Ազգային գրադարան



NL0368908

57644